

隨園全集

文集



小倉山房文集卷六

錢唐袁枚子才

福建總督太子少保姚公傳

公姓姚名啟聖字熙止浙之會稽人生而倜儻以豪聞弱冠時路遇健兒劫二女子行其翁隨之哭牽持洵洵公大怒卽奪健兒佩刀殺健兒縱翁與二女子去而已逃入旗聖祖登極公以布衣上疏請八旗開科遂舉康熙二年鄉試宰廣東香山縣明末廣東寇災民稅不登知縣坐負課獄繫者七人公嘆曰明年增吾爲八矣乃張樂置酒出七人於獄痛飲之爲辦裝遣歸而通牒大府云七令名下應追金十七萬已於某月日收庫訖督撫驚疑公巨富代償帑行善而不知公故寒士實未辦作何償也居亡何三藩反天子命康親王南征公謂其友吳興祚曰我賈禍大非佐王立奇功不得脫欲說王非子不可吳許諾乃予金五千俾通門闌之厮又陰探王好彈爲造十萬丸銀泥封雜施五采藉吳獻之吳亦貌玉立甚口熟悉八閩阨塞錢糧兵馬之數王與語大悅飛檄廣東辟公參謀督撫知爲公所賣迫於王命不得已將所虧帑強海商填庫而遣公行當是時閩王耿精忠脅鄭經同反經者成功之子據臺灣者也先一年其將黃梧以海澄廈門降經爲精忠所誘復煽遺孽據廈門使其將劉國軒等拒王師會精忠已爲浙督李之芳所敗窘乞降王不許公請於王曰此二賊者如韓遂馬超不離之卒難破也請許精忠降而專攻經王許之公招降潮州賊劉進忠汀州賊韓大任皆滇逆吳三桂黨也王嘉其功奏授溫處僉事道再擢福建布政使公率其子儀攻紫閩山破之又擒賊將曾養性於溫州上知公可大用加兵部侍郎銜總督福建

以吳興祚爲巡撫康熙十七年海澄公黃芳都統穆黑林等戰敗於祖山頭退保海澄國軒攻陷之乘勝取長泰同安進圍泉州再逼漳州兵號十萬壁於龍虎蜈蚣兩山軍容甚盛城中兵少公以五蠟丸檄泉州兵來援不至耿精忠悔其降大慟將軍賴塔欲棄城走公曰賊驟勝而驕謂我不能軍也請不戰以懈之而出奇以破之命閉城門韜弓臥鼓忽一日天大霧公吹篳篥者三壯士鍾寶等突開城持長戈先登而公自率精兵五千繼之呼聲震天賊不辨衆寡自相踰籍陣遂亂自辰至酉斬首四千生擒千五百人國軒敗走海澄公收復長泰同安等處進攻海澄海澄者濱海地也峻而險賊據之築塹高數丈排列艨艟守金門諸島密若布棋相持一年不決公開修來館招降人奏設水師提督練水戰分遣散兵擾其餉道賊漸乏食十八年吳三桂死其五鎮將黃靖等相繼來降經大將朱天貴亦降賊勢愈蹙十九年公會同巡撫吳興祚提督萬正色水陸進兵攻海澄克之賊逃歸臺灣先是鄭有梟將曰施琅斬經嬖來降上授水師提督屢立戰功公知琅熟悉海道奏取臺灣非琅不可又奏鄭經死子少國內亂時不可失上乃使公與琅同進兵琅請出銅山蘇尖開洋乘南風攻澎湖公欲待北風直趨臺灣彼此意見不合各有奏聞會南潮驟發舳艫乘疾流逼壓賊壘被賊圍困琅駕樓船衝突入圍公率兵相助至鹿耳門門仄水淺鼓之舟不得上賊據高險處曳足觀揚揚自得公禱天妃廟借水明日大戰砲發水驟長一丈舟並行如鳥張翼而上賊錯愕不知所爲哭曰天也夫復何言國軒與鄭經子充礮面縛反接以臺灣降自康熙十三年用兵至二十二年福建平天子晉公兵部尙書太子少保授琅靖海將軍封靖每侯公身長七尺白皙兩目精光四射手勒奔馬用弓至二十石麾下所養奇材劍客皆能

得其死力臨陣時應變如神而性慈不妄殺戮先是閩人困軍供十室九匱當事者遷沿海居民於內地界而圍之越者死民多流離滿兵奴其老稚鞭箠呼號公受總督印卽奏滿兵不宜水土宜撤歸又奏康王體尊不宜久暴於外宜先班師疏三上天子報可兵歸者猶驅子女北行公向玉涕泣求下令嚴禁而私傾家財贖之凡捐金三十萬贖所俘二萬餘人還閩中又請開海界復民田廬聽降卒墾荒土資其生列戍於外以防衛之閩人歡呼祝延處處肖公像爲生祠初廈門有石文云生女滅雞十億相倚人多不解及臺灣平或曰十億兆也加女姚也鄭字酉旁雞也滅雞滅鄭也當芝龍起事時公始牛傳四世六十年而爲公滅公滅鄭之次年疽發背薨

威信公岳大將軍傳

公姓岳諱鍾琪字東美一字容齋先世湯陰人爲忠武王飛之後十七世徙居蘭州父昇龍以百夫長從征吳三桂立功累遷至四川提督因家焉薨諡敏肅公公有至性母苗太夫人疾刲股以療敏肅公命之射猶忍痛發矢爲兒時好布石作陣進退羣兒頗有法敏肅公器之奏以同知銜改武授松潘鎮遊擊遷永寧副將康熙五十八年西藏達哇藍占巴等叛天子命十四親王爲大將軍噶爾弼爲副將軍率公征之公領兵四千先至察木多獲逃酋探知有準噶爾使者在其地誘各番酋守三巴橋遏我兵公念三巴橋者進藏第一險也賊若斷橋守之我兵勢不得過而其時兩將軍隔數千里無由咨詢乃選能番語者三十人衣番服飛馳至落籠宗禽其使者五人殺六人諸番聞之驚以爲神兵自天而降相與匍伏降無梗道者已而副將軍率諸將來會將鼓行入藏忽大將軍以調蒙古兵未至檄諸將各就

所到處屯兵待之毋輕動公請於副將軍曰我兵齎兩月糧自察爾多來已四十餘日若再
待大軍糧且盡聞西藏部落有公布者爲其右臂最強能檄令先驅當無俟蒙古兵也副將
軍許之公即招撫公布渡江殺逆番七千人擒首犯達哇等自四月十三日用兵至八月十
九日西藏平 聖祖嘉之由副將遷四川提督駐松潘雍正元年青海羅卜藏丹津寇西寧
大將軍年羹堯召公會謀公沿途勦撫有潘下等番爲賊阻道者滅之有哈齊等番爲賊虜
者撫降之有果密等番盜官馬聚大石山喊鎗者擊殺之自松潘行至西寧五千餘里烽烟
肅清青海爲之奪氣既見大將軍即奉檄征爾格弄寺喇嘛於華里羅氏黨也華山甚險其
下五堡環峙軍到寂然公曰是有伏也遣騎搜之堡內賊果起公三分其軍奪山殺賊賊敗
走追至一山有高樓賊伏其中發矢石公命健兒二十人密攜引火木栳從兩旁進而躬率
大隊迎戰戰方鏖樓上烟起天大風燄光灼耀賊累累然焦爛墜矣是役也破賊萬餘公兵
止三千也還營大將軍喜謂公曰 上知公勇將命公領萬七千兵直搗青海約四月啟行
何如公曰青海賊無慮十萬我以萬七千當之宜乘其不備且塞外無畜牧所不可久屯鍾
琪願請精兵五千馬倍之二月卽發大將軍以公言奏世宗壯之加奮威將軍如期出塞行
至崇山見野獸羣奔公曰此前途有放卡賊也蓐食速驅果禽百餘自此賊探信者斷矣至
哈達河賊據河立營公渡河戰斬千餘人賊竄而西追之其黨貝勒彭錯等降告知羅卜藏
丹津擁衆數萬駐烏蘭大呼兒公拔營夜行遲明至其處賊尙臥馬未銜勒聞官軍至驚不
知所爲則皆走生擒賊母阿爾太哈賊妹阿寶等羅卜藏丹津衣番婦衣騎白駝走噶爾順
公留兵守柴旦木要害處而躬自追之日行三百里至一地見毳毼然紅柳蔽天目不能望

遠夷人曰此桑駝海也路自此窮矣公乃班師是役也公以五千兵往返兩月降台吉三擒台吉十有五斬賊八萬餘生獲男婦軍器駝馬甲帳無算獻俘京師 世宗告廟御太和殿受賀以青海平大赦天下加公公爵賜詩褒寵仍命率師二萬征莊浪衛諸番皆青海餘孽也所至讐服乃安插洛力達等十六族耕地起科而奏改莊浪爲定番縣三年遷川陝總督五年準噶爾叛 上命大司馬查郎阿至關中築壇拜公爲寧遠大將軍征之公率師至巴爾庫勒賊逃公築東西城將屯兵會 上召公乃交印於提督紀成斌身自入都賊伺公行入劫馬廠紀蕙縮不救廷議者劾公失機所薦非人 上斬成斌下公於獄 今上登極之二年赦歸田里十三年起公爲四川提督征大金川先是經畧張廣泗等皆無功公到命撤土兵募新兵揚言攻康八達而暗襲根雜奪四十七碉樓復臨勒歪口僞運糧狀誘賊伏火器待之賊果出搶糧槍筒齊發爛先是金川聞 天子用公皆不信曰岳公死久矣至是大挫方疑公來然猶未知公果在否也會 天子命大學士傅恆視師誅姦人阿扣王秋等賊懼欲降恐降而誅負固未出公請於傅公曰鍾琪願詣賊巢驗誠否問帶若干人曰多則賊疑非所以示信也乃袍而騎從者十三人傳呼直入羣苗千餘皆擲布襖襠裹甲持弓矢迎公目酋長故緩其轡笑曰汝等猶認我否耶驚曰果然岳公也皆伏地羅拜爭爲前馬導入帳手茶湯進公公飲盡即宣布 天子威德待以不死之意羣苗歡呼頂佛經立誓椎牛行炙留公宿帳中次日酋長莎羅奔等從公坐皮船出洞詣大軍降事聞 天子加公太子少保兵部尙書復還公爵加威信二字以寵異之十五年冬西藏朱爾墨突叛殺都統傅清等公會同總督策楞討平之十六年雜谷鬧土司蒼旺有異志窺取舊保城公得信亟言於策

公曰雜谷關即唐維州最險要聞蒼旺密調九子龍窩等處兵據維關此地一失後將噬臍宜及其未集擊之若待奏下則遲矣策公深然之即會奏便宜行事支武弁一年養廉兵三年糧率大軍夜圍雜谷擒蒼旺斬之撤土司設營置戍羣番懃服十九年再討墊江酋陳崑未至卒於軍年六十九 天子震悼予祭葬賜諡襄勤公長七尺二寸駢脅善射寡言笑日炯炯四射食前方丈饒飲兼人其忠誠出於天性征青海至哈喇烏蘇天寒溝涸軍渴公禱於天水即湧出督川陝時有逆人曾靜者上書勸反立禽以聞放歸十餘年廬於百花潭北野服蕭然忘為大將所製鈎梯戈甲精思詣微他人依古法為之俱不能及閒居手通鑑一編好吟詩有薑園蛩吟二集行世相傳番僧號活佛者倨受王公拜不動見公則先膜手曰此變身韋陀也僧言雖誕然亦可想見公之狀貌云

舊史氏曰枚與公次子油同舉孝廉於公為年家子以不及見公為恨第七子灑為六安參將恂恂儒將有父風與枚雅遊甚懽持公狀索枚立傳惜當時秉筆者敘次回冗讀之不甚了析為以意纂輯著於篇恐未足以傳公也公長子濬甫弱冠巡撫山東明達寬靜吏民懷之為公入獄故終歲七纓衣蔬食不宿於內亦偉人也當集其遺事為別立傳

勇略將軍趙襄忠公傳

公諱良棟字西華陝西寧夏人年二十四以武勇受知於大將軍孟喬芳從英王征陝授潼關遊擊再隨經略洪承疇征雲南遷副將康熙元年滇王吳三桂奇公奏擢廣羅鎮總兵公知三桂有異志以疾辭三桂大怒欲劾誅之總兵沈應時為異詞以解免隨入關補天津總兵十三年三藩反陝西大震寧羌惠安兵變殺經略提督

聖祖命公征之議者疑公陝人不可信公請留家口於都而已率勁兵馳往 上許之時官
兵敗散屯堡荒廢公沿路曉示招官歸原汛兵歸原伍劾貪募健兒軍威大振斬首逆熊
虎等四人寧夏平上疏奏蜀爲滇黔門戶若不先恢復則滇黔路不通請乘勝進兵 上許
之公率兵抵密樹關遇賊敗之禽其將徐成龍遂取徽縣過高山深箐數十重晝夜兼行抵
白水壩時康熙之十八年除夕也壩爲川江上流與昭化層齒俗號鐵門坎賊防守尤力沿
江立營爲石囤木柞張砲公下令曰元旦渡江大吉違者斬黎明公騎驪馬率麾下五千人
橫刀渡江江淺爲萬馬騰簸波濤盡立呼聲震天賊連發砲傷數十人無敢回顧者賊大驚
曰此老將軍軍令如山不可抗也方格鬪天忽風吹馬如吹舟頃刻抵岸斬賊將郭景儀等
獲器械旗幟馬匹無算餘賊奔竄追之再勝於石峽溝十日而克成都公入城秋毫無犯收
金銀印二百六十僞劄千奏繳之 上大喜手詔褒美加勇畧將軍兵部尙書總督雲貴公
密奏滇黔恃蜀爲捍蔽今蜀已得而吳三桂又新死宜乘機速進 上許之當是時王師征
滇貝子章泰自貴州進兵滇池將軍賴塔自廣西進兵黃草壩滿漢兵十萬餘圍城九月未
下米斗四金月需米六萬石公至軍即向貝子陳三策其一稱欲取內城先破外護使賊匹
馬不能出方可招降其一稱我兵匝圍太遠自歸化寺至碧雞關東西七十餘里調呼不靈
宜掘裏壕相攻逼其一降者宜分別收養不宜盡發滿洲爲奴貝子不悅以滿洲語相駁詰
而公又漢人不解滿語張目牴牾幸公已奏聞 詔下悉如公策貝子不得已與兵二千攻
得勝橋公望見橋頭砲臺甚密白晝攻所傷必多乃伏馬兵於南壩兩岸分步兵爲三隊營
壕牆外牆上架交槍子母砲身披馬綿持大刀督陣夜二鼓攻橋賊盡出死戰其帥郭壯圖

親搏戟三進壕牆而伏兵三起應之列炬如星槍砲雨下賊敗走公奪橋追至三市街再敗
之天猶未明也平明入東南二門郭壯圖舉火自焚三桂子世璠自殺餘賊盡降雲南平加
一等精奇呢哈番召入都以將軍管鑾儀衛事公破城所得降將僞官俱不殺并代奏乞恩
以故樂爲盡力每戰有功然本秦人性戇氣陵其上首創取蜀之計將軍吳丹王進寶等咸
嫉忌吳故大學士明珠從子怙寵而貪公尤輕之每論事輒不合初吳三桂聞公取蜀大恚
遣將胡國柱陷永寧建昌兵部責公不救議削爵 聖祖不許公引兵克復兩郡追賊至大
渡河 聖祖命公乘勝進滇而大將軍貝子屢檄公先追獲胡國柱再往公不從攻得勝橋
與兵甚少公爭之許以在南壩相救及鑿戰救不至得橋又改命蔡毓榮守之公積不平入
朝屢忿爭於大學士明珠前明珠雖怵以好語然以吳丹故心終不善也公乞骸骨歸許之康
熙三十五年 上征噶爾丹以公老將復召公年已七十五遂上表明心迹一疏分十四條
洋洋數千言貶諸將軍不值一錢而自序戰功最苦爲部臣所抑語氣傲悍御史龔翔麟劾
以大不敬宜斬 上優容之命赴行在問方畧寵賜優渥憫其老放歸數年薨謚襄忠公雖
武人好觀通鑑家居聞知縣呼騶過門便拱立喚家人子弟齊起曰父母官過敢不敬乎其
樸誠如此子四人位皆至制府中丞

論曰以馬伏波之勳而晚年主恩衰替范蔚宗以爲功名之際理固應然公之功名有類伏
波其長者家兒爭相傾軋則有甚焉且誣公謀反然而竟以令終者何也孔子曰惟天爲大
惟堯則之 聖祖如天無所不照無所不容公遇 聖祖公勝伏波矣公薨 聖祖諭祭云
事久而乃績彌彰人往而朕心長眷嗚呼使死者而無知則可死者而有知其如何讀而感

感而悲也

于清端公傳

公姓于諱成龍字北溟山西永甯人順治十八年以副榜宰廣西羅城縣故烟瘴地多苗以攻劫爲俗公與爲誓毋弄兵器毋盜苗敬信之轉相告語馴伏或三日或五六日必率子女問安在羅五年舉卓異遷合州知州再遷湖廣黃州同知巡撫張朝珍知公才命討武昌賊黃金龍卽守武昌當是時三藩反金龍陰受吳三桂僞劄屯兵據險其軍師劉君孚者爲訟事受公恩者也公知衆寡不敵乃騎一騾從一鄉約直入劉家劉欲探公意逃山後不出而陰張強弩待公公罵且笑曰君孚老奴受我恩避我自慚作賊耶渠不過爲人逼誘耳我老人髮鬚如此甯不曉也語未竟君孚從廚後躍出投弓跪曰君孚祖宗有靈使公至此降矣尙何言卽日降其衆數千武昌鄉勇亦至問金龍何在曰在望花山卽命導行乘其不備擒之撫軍喜奏實授武昌知府再調黃州甫抵任湖北大亂何士榮反永甯鄉陳鼎業反陽羅周鐵爪反白水劉啟業反石陂各擁衆數千號十萬陽言先取黃州議者謂援兵隨大軍征滇黃州兵少宜退保麻城公不可曰黃州湖北咽喉也棄之則荆岳七郡皆瓦解矣仗天子威靈可以一戰徵各區丁壯自草檄先攻鼎業擒之再攻士榮戰於黃土坳賊勢甚盛紅旗殷山礮雨下隊長吳之蘭焚死火燎公鬚不爲動手劍立營門而陰令三百人自右山擊賊後賊大亂敗走公曰諸賊中士榮最強士榮旣破諸賊膽落宜乘勝攻之諸營方炊覆釜以進預伏兵于鐵爪等敗逃處果悉擒之乃勒石黃市旗亭班師而還是役也爲先鋒者把總某協謀者門下士某引路者鄉民某督陣者公也不費公家一錢二十四日而黃州平

遷江防道再遷福建按察使福建當耿精忠亂後康親王駐軍省中牧馬者月徵莖夫數萬公爭于王前罷遣之海寇犯漳泉有莠民通海起大獄株連千餘家公平反之滿兵掠浙東子女沒爲奴婢者數萬公贖還之王與諸大府素知公名公所言靡不聽遷布政使舉清官第一巡撫直隸再遷兩江總督官吏望風改操知公好微行遇白髯偉貌者羣相指震懾士民有歡笑無管絃游惰不空手櫃坊無鎖年六十八巡海歸薨天子震悼給祭葬加贈太子太保諡清端軍民巷哭繪像以祀公清介絕俗重門洞開白事官吏直入寢室左薑豉右薄書狀如鄉里學博而用兵如神尤善治盜知黃州時聞張某者盜魁也崇閔高垣役捕多取食焉慮少遼緩姦不得發乃半途微服備其家詭名楊二司洒掃謹張愛之使爲羣盜先居亡何盡悉盜之伴侶胠篋機密約號乃遁去鳴鉦到官一日者集健步約曰從吾禽盜具儀仗兵械稱媿前行至張所排衙于庭大呼盜出張錯愕迎拜猶抵攔公曰勿承可仰面視我楊二也張驚伏地請死公取袖中大案數十擲與之曰爲辦此足以贖矣張唯唯願一切受署合門妻子環跪泣曰第赦盜死盜不能者某等悉如公命公留健役助之不數日羣盜盡獲其殺人者活埋之武昌營弁某弟素無賴適遠歸是夜軍餉盡劫弁告弟所爲彭考誣服連引十餘人獄具獻盜公破械縱之撫軍驚問曰盜寃曰眞盜何在公指堂下一校曰是眞盜也餘黨進香木蘭山今晚獲矣未幾獲盜贓尙在校家封識宛然江甯盜號魚壳者拳捷倚駐防都統爲解有司莫能禽公抵任時官吏憚公遠迎公日旰不至方驚疑探刺而邏者報公早單車入府矣羣吏飾厨傳不受饋餼牽不受一郡不知所爲按察使某公年家子也從容言公過清嚴則上下之情不通某意欲具一餐爲雅壽公笑曰以他物壽我不如以

魚壳壽我按察使諭意出以千金爲募雷翠亭者名捕也出而受金司府縣握手囑曰我等顏面寄汝矣勉之翠亭質妻子于獄偵知魚方會羣盜張飲秦淮乃僞乞者跪席西呢呢求食魚望見疑之刃肉衝其口雷仰而吞神色不動魚昨曰子胡然子非何也子爲于青天來禽我耳行矣健兒肯汝累乎翠亭再拜羣役入跪而加鎖擁之赴獄司府縣賀于衢是夕公秉燭坐梁上蒼然有聲一男子持匕首下公叱何人曰魚壳也公解冠几上指其頭曰取魚長跪笑曰取公頭不待公命也方下梁時如有物擊我手不得動方知公神人某惡貫滿矣自反接銜匕首以獻公曰國法有市曹在呼左右飲之酒縛至射棚下許免其妻子遲明獄吏報失盜人情洵洵司府縣相賀者轉而相尤趨轅將跪謝告實而公已命中軍將魚壳斬決西市

論曰公筮仕羅城年已四十五不二十年督兩江名震天下其初心豈及此哉自言治兵武昌因草豆不足頭搶柱欲死者數矣孟子動心忍性之言不其然乎魏尙書環極以公與陸稼書同薦海內榮之然公晚年出張中丞手書輒鳴咽流涕蓋魏公猶識之于名成後而張公先識之于名未成時子皮鮑叔之功尤爲難也江甯人傳公魚壳事甚著考澤州相公毛稚黃兩傳皆無之故別立一傳不使文人釣奇獨病太史公云

贈編修蔣公適園傳

公諱堅字非磷號適園江西鉛山人生而家貧肩粟養母困童子試鬱鬱乃請於母曰兒年二十八矣未博一衿幸諸兄侍願遊學如歐陽詹母許之先入都至山右漢陽嶺南薊門河洛諸郡而晚年再遊京師公精法家言諸侯爭延之代州有大獄囚纍纍可隱人撫軍檄

崑嵐牧甘公辦治甘聘公行獄立具殺七人釋無辜者百八十人酒姓兒娶婦月餘弟迎姊歸將入村失姊懼反誣酒氏官下酒氏翁于獄七年不決公從太原返吏指前樹林曰此酒氏家也公心動隸馬而之乎山凹有人扃戶博問之一兒覺異拍髻者肩告之衆咸喑曰鬼耳人則安能來公跳歸白甘公篡取鉤距果髻者所略也臨汾令某縱吏暴征民變棄家登山撫軍檄澤州牧佟公辦治聘公行日驅三百里至平陽能屬者裁四騎山十人如蟻蠟樹鉤鋤爲兵張旗洵洵公手令箭而先周山呼曰撫軍知而等良也爲姦胥逼反特遣佟使君來活汝宜各甯爾家有目者視此箭山上人禁聲稍稍下公導餘騎入縣縣庭瓦礫山積令從夕室出率犯法吏六人跪佟前民環門而囂欲毆之公叱曰勿妄動有王法在乃榜吏於庭血流民懽噪拜謝去安堵如故次日四鼓牽官吏詣省白撫軍撫軍大悅飲佟酒而手炙鹿尾啖公公幼卽以智俠自喜七歲隨叔父遊法雲堂聽僧誦經廡下坐縣捕數人私語某寺僧被殺主名不得奈何公辟呬于叔曰殺人者堂上老僧也叔呵之曰渠誦經屢顧不在經故疑之捕者牽僧去一訊而服十七歲阻風瑞洪鎮有少年同舟舟人哺食少年登岸再食再登岸公疑而迹之見其蹲古廟大鐘下色焦然瞪也曰余南昌熊白龍家貧告急於河口戚不遇反寄食舟人未償其值而又遇風舟人將不余食焉故避此語畢泣公亦泣強入舟與共食而資以金熊感謝歸邀過其家見母誓爲兄弟居亡何熊來曰權弟金獲利市三倍今將販纒臨安無所託母妻故來弟知吾父有養子白蛟乎素無行脫有故弟善持之言畢去逾年繪主人執訊來曰熊某死矣餘金若干日且暝屬曰爲我報蔣君公陰念歸龍喪非蛟不可而蛟見金必叵測乃札覆主人授部署法遲十日告熊母母果遺蛟往已而召公

哭曰蛟至浙兒骸已焚闖然在桶舟人負之納我圃此外不有其藏一錢奈何公慰母再三而身自往圃哭視畢走出母牽公袍曰聞繪主以兒金寄君金之來由君然貿易者與有勞焉幸析半惠老身何如公未答蛟突前睨曰須南昌廳事明之耳公叱曰何必南昌廳召二三鄰父來卽明也蛟嘆喏肩公去俄而龐眉者六七叟至公曰所以囁嚅者受亡人託防蛟故也防蛟爲母故也今母見逼事不得不速明請詣圃乃繞桶而號曰白龍知我白龍知我斧之複底脫鏡三具墮地光瑩瑩然鎔金也裹以簿券衆取視感泣嘆老嫗目昧不知人未幾蛟果竊金遁矣公五十歲家居聞佟牧爲負課事繫獄憮然曰我不往則難不解先至天津撫其家再至澤州視佟佟方缺金五千自分無全理且老不肯食聞公至爲加一飯會太守有疑獄聘公公曰若助佟我助若太守喜張示勸募州人負刀布麕至三日而畢佟行公乃行公有神力而敏於爲善遇盜許昌兩騎截路中五人行劫公怒射一人顛再發再顛盜驚捨所劫者來搏公公縱馬入刺殺一人馬逸公仆躍起復殺二人餘盜乃竄被劫客爲公牽馬出林羅拜問名姓去又嘗行寄嵐道中兩峯夾溪天暴雨泥沒馬鼻有婦抱兒騎一童子負策從公慮其溺救之非錢莫以也乃解數緡挂馬首須臾婦溺童子驚亦溺公大呼救者贈錢萬搖其繩錢鏘鳴途人應聲往皆掖起之送甯其家公四十六歲始娶鍾夫人生子士銓官編修朝廷贈公如其官公卒時年七十一猶及見士銓舉於鄉也

贊曰讀史遷班固揚子雲諸人自序輒嘆人子孫生一顯人不如生一文人何也彼顯人者於乃祖父僅封秩追崇之已耳若夫述世系揚風烈非其才孰任焉士銓以文伏一世偏矜寵余文丁亥元日披七品服祀公即持公狀入山乞傳狀厚如梵夾讀之累夕不能盡乙其

處者凡三十有餘事嘻何其富於善也今之爲公卿者生赫赫死則序恩榮數行便灑然盡
公布衣也瑰意琦行紛疊若是雖公意踔絕不以仁義讓人而士銓之腹存手集羅縷畢貫
其才高其志尤足悲也予輯而傳之困於體例無能多書然其犖犖大者殆無遺焉

高守村先生傳

聖人之道大而博學者各以其學學聖人要其至焉耳後世河北宗鄭江左宗王尙未聞其
有所拘闕也東天下而崇宋儒自元明始於是高才生退有後言且過激人見其激也又羣
驚爲奇服怪民而莫敢近焉是過也乾隆甲戌高先生守村訪余於白下年七十許清矍噩
立高睨而大談解孔孟專攬摛宋儒其所見亦未必盡是要皆的的然有心得者余灑然異
之別六年陶明府京山從滇歸道先生守姚安事甚具又十餘年蔣苕生太史來賢先生不
絕口二人非妄譽人者余益信先生果奇男子也苕生授二石刻曰此先生知平彝劍川二
州德政碑也滇人不文序事不識體制又過欲揚頌如郗鑒見王導意滿口重言殊不流子
其采而傳之其一碑曰先生廉不言貧勤不言勞王師征烏蒙運餉六千石而民不知理
糶訟可和者和之可決遣者決遣之罔不當其一碑曰征劍川糧減額外公件銀每兩若干
引老君山水漑西莊畝收增數輔丈鵝雅場清其界酋夷皆拜曰從此百年無事矣嗚呼滇
最懵俗也能齊其口爲無窮之聞以存先生然則碑愈俚民情愈眞想先生之經德秉哲殆
不愧其言者先生亡已久子弟才下無所發明門生故吏又懼大忤於俗不敢張其說余聞
而悲之夫犯衆敵抗令甲以追取聖人之心此其志直合萬世爲一朝者而卒之身甫歿姓
氏就湮然則與夫庸庸然曹出曹入者何以異也天之所以生斯人使獨異於衆人者又何

也追憶當日先生與余天涯一邂逅耳豈料身後事余爲存之而余亦豈料十餘年後尙有先生兩知己在耶夫儒者闇然之學原不爲名計而卒其所以常存於天地間者又捨名曷以哉嘻古之人所以重後死者也先生名爲阜鉛山人

常德府知府張公傳

公諱開士字軼倫浙之仁和人世居北郭青莎里先人好施貧其家公生九歲而孤乾隆元年舉於鄉七年成進士選銅陵縣知縣移知桐城宿州擢常德府知府未之官居太夫人憂服闋將行竟不起公曼詞矩步造次必於儒者然義之所在展意無所依回銅陵災公請振饑委官某揣撫軍范公意捉搦之公趨皖江見范公泣曰民無鳩矣苟蘊年而壅利安用官爲言畢袖印置几上再拜求去范改容謝之聽其請桐城某公所拔士也爲盜張六韜所誣某父以財夤緣公怒其父曰汝欲速而子死耶某懼闔門待罪公廉其姦召六韜曰汝誘之博博負而教之作盜果誰爲禍首耶六韜泣不能聲乃專坐六韜宿州河決公戶籌口算輕糶重振符牒風發縛木橋渡商旅艤船甯村中氓設淖糜四門資蒙袂者或慮爲私累公笑曰縱於官難開除吾以活人破家不亦光於古乎爲之益力亡何水涸

天子輸庫金百萬修水政公爲植巡功宿於堤陳畚揭綆缶仞其溝物其土方畢歲乃大稔江南最大省羣吏才智縱橫各自矜奮而公盤辟雅拜言詞迂緩常侍今兩江制府高公坐欲有所陳先搖首引書語高公笑曰汝又竇竇作學子態耶滿席爲之蹶然兩薦知府他吏不得獨公得之皆高奏也聞其死爲嘆息者再居官二十年家無生產女壻陸建余甥也先公兩月亡公哭之哀數月亦亡長子懋謙能文世其家

論曰余雅遊公三十年見其讀書窮晝夜額頰雖除夕元辰聲鳴益高醉後好摹古忠臣烈士狀津津然欲蹈之服闋時裁五十九自衰其年雅不欲出而簡書催行肩項相望公愈感天子恩不得已置酒召諸故人訣別泣數行下若預知其往而不返者然幸卒病於未治裝時得委化正寢近子孫親湯藥人以爲善人考終報也嗚呼有以也夫

湖北布政使徐公傳

君諱垣字紫庭會稽人也生而端靜坦中任真不與人爲同異以戊午舉人已未進士入翰林散館改授戶部主事累遷郎中記名御史出爲廣信府知府南贛巡道安徽按察使乾隆二十一年皖江災劫案屢起有司以盜報君審知皆饑民以搶奪論全活甚衆旋擢四川布政使調貴州再調湖北當是時貴州巡撫周人驥奏開安順南明兩河運銷銅鉛行二年安順灘勢平夷輪輓尙利南明灘高兩山夾峙每大雨衆流匯注所開峽口盡淤舟不能行周又護前不敢再奏有司迎合其意爲僱駝馬陸運而仍以水運報公密奏其狀且云撫臣以節省運費故苦累民苗殊乖政體 上矚其言命總督吳達善勘明停止官民懽呼公甫卸事即病行至常德府薨年五十一嗚呼當公任部曹時即爲 上所知及試之於外歷四省觀察屏藩之任均能稱 旨其即大用無疑乃驟以服官政之年中道而廢豈不惜哉然至今有自黔中來者道馬戶苗人猶能記公姓氏延祝不衰則儒者澤物之功其效亦可觀矣余嘗過山陰至其家四壁蕭然不知其爲方伯第也有子曰秉鑑公四十後方生薨時尙幼故一切善政不能記憶約狀其大略屬余爲傳

贊曰進士同年較鄉試少故相親亦倍焉若同入翰林則更少且更親矣然不數年升沉稍

殊或爲名位所移異日相視卽陽爲謙下而陰實相疎者亦比比然惟公能始終一致幾微無改於常可謂大行不加之君子矣余與公同習國書廷試時諸翰林掩護其卷栩栩自私而公獨任人窺觀有詢必告其心地光明亦可想見在蜀時余寄長歌懷之詩未到而公亡尤余所惻惻而悲者也

錢唐袁枚子才

河道總督陳恪勤公傳

公姓陳名鵬年字滄洲長沙湘潭人生時太夫人夢大鳥挾一青衣童子來故命之曰鵬以康熙辛未進士知衢州府西安縣有善政大學士張鵬翮薦之移知山陽遷知海州再遷知江甯府江甯俗父母死子必親訃公頒士喪禮禁之惡捕誣良事發赦後公仍置之法康熙三十九年

聖祖南巡總督阿山借供張名欲加稅公不可乃以他事中之落職按驗 聖祖赦其罪命

入武英殿修書起知蘇州府蘇大疫公所至疫斷民書公名鎮於門過雜亭鎮見水浮漚心動遣探得屍輸之其鄰乃某村婦手絞其夫也奉 旨攝布政使忤總督噶禮再以陰事中之落職按驗 聖祖赦其罪命入武英殿修書學士沈涵密薦公 聖祖還其奏逾年召公

見曰沈涵薦汝朕疑之今知非汝所聽請故用汝爲霸昌道可乘傳奏事故事督學使者歸輸金修城沈修昌州城有冠花翎者數人稱某王遣來索金勢甚張公僞遜詞延花翎者入而陰伏健步縛置獄中驟馬馳奏適某王入覲 上示以公奏曰無之 上曰然則可聽陳

鵬年處分公杖斃一人枷四人狗於城自是畿甸肅然六十年大學士張鵬翮視黃河奏公協辦公請於廣武山下開引河使溜南趨又請疏南壩尾下流以殺水勢尋署總河兼署總漕漕舟阻風旗丁糧盡公先給河庫銀六萬而后奏 聖祖嘉之以爲得大臣任事體 世宗卽位授河道總督未一年薨 上深惜之賜諡恪勤予祭葬公廉幹有才民愛之如水趨

壑每褫職按問老幼罷市聚哭持糲膠相遺滿洲駐防兵亦率男婦踢門入牽袍嗅靴求一見陳青天狀貌聞 赦詔下焚香跪北呼 萬歲者其聲殷天繫江甯獄或絕其食獄卒憐之私哺以餅爲守者李丞偵知怒杖卒四十曰通一勺水入獄者如之公自分命絕矣忽聞外有貴人騶唱聲甚高曰獄官來我浙江巡撫趙申喬也入覲時 皇上命我語江南督撫還我活陳鵬年不知汝等可知否言畢去不與公交一語未十年公總督南河李爲邵睢同知大懼來謁公公無言李心稍安疑公忘之矣居亡何黃河南岸崩芻茭翔貴治者竹槌石菑需金萬公張飲召河官十餘人入酒行嘆曰鵬年餓江甯獄幾死不意有今日自賀一觥且飲且目李目閃閃如電鬚髯翕張李色變客亦惶視不知所以公笑曰諸君不賀我乎盍盡一觥合席諾聲如雷不能者強畢之俄而奴捧饜饕蹲出磁而餽金者也狀獍惡公起手斟之徧示客曰滿乎曰滿矣持行至李所曰某年月日爲一餅故杖獄卒欲餓我死者非他人即足下也今河岸崩百萬生靈所關不比老陳性命不值一錢也罰汝飲卽往辦治放一勺水入民田者請勅書斬汝亦使羣公知鵬年非報私仇者李長跪色若死灰持罇罇墮地碎兩手自搏叩頭數百滿席客咄嗟回首無一人忍睇其面者李出傾家治河河平來驗工官纓帽小車所杖江甯獄卒也旣李竟慚恨死公於故人子弟孤寒後進汲引如不及賓從歡飲而公目覽手答沛然有餘每人則其家之一蹄一縷必爲資送稱善廣坐訓過密室人銜感次骨入獄道然自憶未了事曰杜茶村未葬某僧求書未與布衣王安節缺爲面別從容料量承鎖而行在蘇舁鬱林石於郡學遊焦山遣人泅水取瘞鶴銘爲亭護之其標寄如此所著詩文若干卷其被逮入京也除夕市米潞河主人問客何來曰陳太守曰是湘潭

陳公耶曰然土人曰是廉吏安用錢爲反其直問住某所次日戶外車聲檻檻餽米十石書一函稱天子必再用公公宜以一節終始毋失天下望紙尾不著名姓問擔夫曰其人姓魏訪之則閉戶他出竟不知何許人也

論曰先有堯舜後有臯夔非遇聖祖雖十陳公烏能賢昔汲長孺魏元成輩束以細荆三十則亦呼譽而乞恩矣譏諷得善諍名皆其所遭者幸也聖祖南巡公不除道不供張甫入獄百姓張黃旗城上曰如喪考妣村氓蠢愚至於如此忌者誣以大逆非無因也而聖祖怡然但云民愛如此甚好爲霸昌道進瓜熟河聖祖詔家人汝主官清不必以常例供奉好將瓜帶歸即賜汝主嗚呼聖祖知公何其深也昔權德輿讀太宗賜李靖手詔不覺嗚咽流涕而嘆曰君臣之際至於如此吾於恪勤亦云

涓君小傳

仲姊嫁陸氏寡攜二孤以歸其季早亡長曰建卽涓君也大眼而頤容貌充充然幼不甚敏旣長澄神於學摩研編削被飾厥躬行安而節和去不善如絕絃年十七補博士弟子張古香太守妻以女從官宿州權記室事甚辦古香絕愛憐之性好吟詩特論與舅氏合不屑屑界唐宋而內寫幽懷外媵羣雅結采必鮮運思必邃其聲清揚而遠聞得若干首或嫌近體差勝涓君笑曰近體近風宜少年古體近雅頌宜晚年吾其有待耶余亦無以難也去秋患咯血五倉頓空心若墜琅玕然迎醫而藥之勿治召巫而占之勿祥予因索其稿涓君知余之有意其存之也脫手交又取去讐字酌句喀喀然柴立吮毫力不勝則臥臥起再讐氣魂矣猶呼阿嬾泣曰舅爲兒詩開雕成否不甚費否兒思遊目焉裁瞑耳其溺苦如此死時

年三十五有子官郎生八年矣嗚呼姊守志撫孤卒與無孤同余哀姊而撫甥卒與未撫同且余年五十髮斑斑有二色無子無兄弟之子而前年壻死去年五弟死今年湄君又死湄君者其才且賢出壻與五弟上而余夫婦恩之又最久日謀以身後託者也嘻其酷矣爲之傳以弁其詩

直隸總督兵部尙書李敏達公傳

公姓李名衛字又玠明初以軍功起家襲錦衣衛由浙遷碭山公伉健有氣入貲爲戶部郎司納粟事親王某屬每金千加平十兩公不可強之則舁櫃置戶部東廂下署曰某王贏餘王大驚諭止之王府歌者殺人公會刑部鞠刑部因王故欲爲道地公爭之急同僚止公而公往益早

世宗心重之登極授雲南驛鹽道遷布政使旋巡撫浙江康熙末年鹽法抗弊滇省有私壓短平諸色日浙商浮費至十二萬州縣赤腳丁錢攤入田畝有田者不占名籍奉土豪爲甲長供奉如奴公一切禁督奏免湖屬浮糧又奏玉環山乍浦近海請設參將同知鎮撫之北新關虧稅司權者患之公奏以南關之贏抵北關之縮往來商大懽雍正四年遷總督節制江南七府五州當是時浙省逆案屢發杭州汪景祺查嗣庭等以誹謗伏誅而妖人曾靜又爲石門呂留良弟子 上震怒停浙人禮部試將大創之賴公外嚴內寬教督於下開說於上致民俗不變 天心回和庚戌殿試前三名皆浙人公駢脅多力鼻孔中通身長六尺二寸痘癍如錢著頰上皆滿而白皙精采豐頤廣頰腰腹十圍善養威重每出繡衣袞袍乘八座露車去其帷壯士一人高丈餘執大刀光明如雪扶輿而趨絳旗黃蓋纛槩葩瑤數十重

鳧藻鴈行罔不整最後馬上鼓吹細樂鏗鏘三四里闔城老稚聞制府鉦聲爭奔趨窺觀日
眩良久引喙始畢而提爐香猶冉冉四散性好武設勇健營募兵教之擊刺一切器仗加鮮
明每霜天大蒐公披金甲執鐵如意登壇指揮先是東南武備遜西北而公自信過之屢請
從征西戎又請長子星垣征楚滇諸苗然世宗終不許也公不甚識字而遇文人甚敬修
浙江志建書院餼廩獨豐公餘坐南面召優俳人季麻子說漢唐雜事遇忠賢屈抑僉壬肆
志輒嗚咽憤罵拔劍擊擗聞鄞縣有王安石祠大怒嚴檄毀燒奏飭十三省督撫修古賢祠
墓諸生入學者行肅拜禮許士女逢春秋節賽會迎神其姦惡則伐瀦其墳事雖不行海內
皆嘉公之志凡文移奏章不過日聽人雜誦不可於意者噉暗命改動中肯綮雖儒者文吏
皆心折駭伏以爲天授疏西湖淤三十里增修祠廟植柳桃春時隄樹盡花水亭風臺金碧
明耀公哺餐畢鳴騶出清波門攜文案坐亭子灣辦治文武屬吏白事者就湖光山色間稟
請意旨判決如流七年召署刑部尙書加太子太保未二月總督直隸故事直隸五總兵
一提督與總督抗行公往悉受節制總河朱藻素桀張公首劾之滅死爲城旦春公負氣好
勝遇權要人務出其上乃已當是時大將軍夔堯河東總督田文鏡九門提督鄂爾奇管
戶部果親王皆隆赫柄用而公輒彈劾搖撼之雖有動有不動然中外側目欲甘心於公者
相環矣賴世宗知公深排羣言眷寵不少衰十三年八月

世宗崩公自知孤危獨立萬無全理入謁

梓宮跪伏大慟暈絕不能起

上知其意召

見慰之曰卿但努力報國

先帝雖崩自有朕在也

賜珊瑚朝珠荷囊兩匣再

賜長子

星垣武探花及第公意始安公尤長於治盜凡盜之巢藪火伴訪知如繪臨期以一錦囊付

將弁往如教即時擒獲所到處江湖千里如枕席行舟桴鼓不鳴不禁妓不擒樽痛不擾酒坊茶肆曰此盜綫也絕之則盜難蹤跡矣先是朱文端公以醕儒治浙考於古頒喪婚宴會儀教民又禁燈棚水嬉婦女遊山民肩背資生及賣漿市餅家弛擔閉戶嚶嚶不得意公雖受知於文端而爲政不相師一切聽從民便歌舞太平誘掖而張皇之民喁喁大和愈卑賤者愈禱頌焉雍正十二年公總督保定與戶部尙書海望同勘海塘至浙遠近村氓以爲公復來撫浙也額手迎者蟻屯數十里歡聲殷天文端公聞之嘆曰古人云觀徐公言論不復以學問爲長斯言信矣公生時太夫人夢神僧授以異寶及卒病黃疸呿聲震屋瓦衙內牛馬皆吼應之同起同止如是者三晝夜氣乃絕年五十三諡敏達論曰

世宗皇帝時才臣任封疆者田李並稱然世之人往往優李而劣田意頗疑之後讀 硃批上諭田文鏡奏禁銅法請民間有拋擲制錢者擬軍又奴婢首主人藏銅器者許脫籍治其主人之罪公奏禁銅法請官增價購有售者卽與值不問所由來亦不治藏者之罪是二疏者在 世宗俱未允行而兩人之見解心術判若天淵已可見矣公每劾權貴拜疏後必鈔稿以示其人嗚呼壯哉

女弟素文傳

枚第三妹曰機字素文皙而長端麗爲女兄弟冠幼好讀書旣長益習於誦鍼衽之旁縹緗度積雍正元年先君客吳中聞衡錫令高君清卒庫虧妻子獄繫嘆曰我高公幕下客也非我往則難不解遂治裝歷洞庭而南告其弟高八曰曩而兄傾庫供上官吾嘗止之而兄不可則勸其簿籍而加印焉亦知正爲今日計乎高大悟檢篋得印簿訴制軍制軍者大學士

邁柱也素善先君兼知高公之寃爲平其事當是時簿中貴人隱探高氏孤稚無能爲使人具三千金啖先君先君怒而叱之高八益感謝臨別泣曰無以報聞先生第三女未昏某妻方妊幸而男也願爲公壻已而果然因寄金鎖爲禮時妹未周晬枚長妹四歲代繫金鎖飾項者數年高故如臯人而先君自楚歸復之粵之滇之閩與高氏音問遂絕乾隆七年高八執訊來曰某子病不可以昏願以前言爲戲先君猶豫妹侍側持金鎖而泣不食先君亦泣亦不食以其意復高氏高之族人驚謹傳高氏得貞婦高八歿其兄子繼祖來曰壻非疾也有禽獸行叔杖死而蘇恐以怨報德故靈言辭昏賢女無自苦妹聞如不聞竟適高氏高渺小儂而斜視躁戾佻險非人所爲見書卷怒妹自此不作詩見女工又怒妹自此不持鍼黹索奩具爲狎邪費不得則手搯足踈燒灼之毒畢具姑救之毆姑折齒輸博者錢將負妹而鬻妹見耳目非是告先君先君大怒訟之官而絕之妹歸侍母母體微不適妹徹夜立持粥飲而七箸進之又記稗官雜史國家治亂名臣言行神仙鬼怪可喜可愕者數稱說歌呼爲老人娛枚入定省聞所未聞學爲之博自離壻後長齋衣不純采不鬢鬢不聞樂有病不治遇風辰花朝輒背人而泣如臯人至必出問堂上姑安否寄贈服食甚謹前一年高氏子死妹亦病以乾隆二十四年十一月死年四十枚在揚州聞病奔歸氣已絕一目猶惝也撫之乃暝女阿印病瘖一切人事器物不能音而能書指形摹意皆母教也想見妹之苦志云檢篋得手編列女傳三卷詩若干

淮徐海道按察司副使莊復齋先生傳

乾隆九年枚宰沭陽淮海道莊公來巡相傳有理學名疑其峻而難近也心沭焉旣至則循

故事餽殺烝公一切勿拒曰物已烹飪却之是暴天物而違人情也凡賓饗與主人共之禮也止枚而觴之三爵後問沈水原委簿領利病甚悉論山經地志星象樂律甚辨出所爲詩甚工越翼日諸生會於庠公上坐講中庸不及傳濂洛語而理境顯顯大明聞者色盡變若欲即駕車赴聖域者然諸生有所陳說雖俚公必靜聽無惰容翼日校壯丁丁疎於技發矢矢旁穿且墜爇火器閉焦其手諸丁伏地請罪枚亦起立皇恐謝平日教敕無素公弛外衣手弓而前支左屈右教如法十八人無不當鵠者火器如之畢就坐笑謂枚曰而奚慊慊耶藝成而下文人不習常也專心治民吾職在巡年年來爲汝教馴之耳枚聞愈不安睨諸壯丁皆嘆有泣者先是大府巡沈饋牲牢不受令租驍蔽土食不受矜嚴若神及去庫爲之虧公來飲食笑語盡主賓歡及去無角尖耗如春風歸留餘溫而已所從隸六人蒼頭二人僮一人皆自飲其馬犢之蹠而辭曰公視奴輩如兒子不告而受於心不安告公公必命辭是仍虛君惠也強之皆伏地誓指其心乃聽之公諱亨陽字復齋世居漳州靖南縣之龜山康熙進士初知濰縣迎養太夫人道亡公自此不復仕今上元年以楊文定公薦 召見授吏部主事出爲德安同知遷守徐州蘇松道汪某以危法中沛令某督撫白簡繕奏命公補牒公牒稱沛令不侮鰥寡不畏強禦汪聞悛而止果毅公訥親巡江南聲耀隆赫監司皆鞞袴跪迎公獨長揖訥責問曰非敢惜此膝於公其如會典所無何訥默然尋遷淮徐海道海州有河通海以運鹽故雖暴漲非徧告諸大府不敢闢公力請得以時開勘淮海災過勞以羸疾卒年六十一卒之日淮海諸氓罷市奔走樹素幟哭而投賻一日至六千緡嗚呼至誠而不動者未之有也公殆眞儒也已公少時受知於李文貞公光地成進士出謝公濟世門謝

亦奇士

世宗時爲御史三日露章奏河東總督田文鏡十大罪前一日夢震雷擊於庭翌日章上果得譴減死戍邊

蘇州府知府童公傳

公姓童名華字心朴浙之山陰人年十二入郡庠屢鄉舉不第乃習刑名從事幕府年四十九循例入賞與纂大清律受知於大學士朱文端公以知縣薦

世宗召見命查振直隸直隸樂亭盧龍二邑報飢口不實公倍增之所全活甚衆會怡賢

親王在直隸問公灤河形勢公條對如指掌王以爲能奏知平山縣縣災公不待報遽出倉

粟七千石貸民總督某劾奏世宗心重之免其罪擢知正定府權按察使事移知蘇州當

是時奉旨清查康熙五十一年至雍正四年江蘇負課一千二百餘萬大府妄測上意

鈎考攤派民不能堪狴犴纍纍無容囚處公向大府開說甚辨大府怒曰汝沽名敢逆聖

旨耶公直前抗聲曰華非逆旨乃遵旨也皇上明知有積欠而不命嚴追特命清查

者正欲清其來歷查其原委或在官或在役或在民或應徵或不應徵使了然分曉然後奏

請上裁恩從中下此聖意也今奉行者絕不顧名思義而徒以十五年之積欠竭竭然

求完納於一時是暴征非清查也曰於汝云何曰寬華限三月當部居別白分牒申報大府

嘿然公出卽釋所獄繫者千餘人而造册若列眉求爲轉奏未幾世宗風聞江南清查不

善璽書嚴飭衆方折伏蘇撫某訪僧與民婦姦製一枷兩人荷以徇公聞卽往破枷縱歸

而自詣轅請罪曰犯姦者枷律也爲一枷兩荷以揶揄之非政體也且姦罪止杖府縣所司

非尊官所宜聞巡撫敬其強直面謝之而心不悅浙江總督李衛篡人江南絕無文牒他府畏其威唯唯聽命至蘇州公抗不與曰地界各有統轄毋相僂也李深嘆之爲蜚語聞上世宗召公見命往陝西以知府用署肅州忤巡撫某被劾罷官今上元年起知福州再知漳州又忤巡撫某被劾罷官歸數年卒年六十六公精勤廉悍善治下不善事上發姦摘伏如神而尤長於水利佐怡賢親王營田直隸得十八泉於正定府城外建西南二陂墾膏腴三百五十頃佐經略鄂公屯田肅州鑿通九家窰五山引水於十五里外升之於二十丈之高穿渠築堡漑田萬畝民至今利賴之所著詩文若干卷其開太湖水田議一篇蓋守蘇時未竟之志也蘇民德公尤深論者以比前明知府況鍾云

論曰傳稱天爲剛德猶不干時公屢干其長官隨起隨顯致不竟其用豈干將莫邪缺折亦其性耶不然何所遭之不幸也公歿至今垂四十年聞其子孫過吳吳市漿賣餅家猶有質衣履供其斧資者嗚呼公得民心久而如此可知誠能動物非一時沽名者流而或謂吳俗輕儇毀譽多浮其實者亦非也

程南耕先生傳

江甯程氏有二賢焉其昆曰綿莊先生余已銘其墓矣其季年亦七十有九曰南耕先生余悲綿莊之不及見余銘也使綿莊見余銘喜當何似因思韓退之爲太學生何蕃立生傳豈非欲其親見之以爲笑樂耶余嘗以此語戲南耕南耕額手曰幸甚遂擴大槩而書之先生名嗣章字元朴一字南耕七歲能詩旣長習舉子業連閱於有司瑣瑣不得志朱文端公與有舊教之曰唐趙匡論選舉以辟召爲先古賢多記室參軍士果有心經世奚沾沾科第耶

先生感焉遂研究刑法食貨諸務識其大者爲人作奏纂詞奮筆得鼂董遺意諸大府走金幣延之憂不得先當是時桂林祁陽兩相公及晏一齋中丞皆負清望居五長十連之任奉先生若仰衡石而果長發也先生參畫密勿彌口不宣章疏稿出火入一切體國經野事秘

外不能知而三人所張施顯顯然海內無訾言先生重抄之工後下夕之

蠲漕先生謂晏公曰災地無米必倍價遠購災民免地丁之一而納漕費之十其何以堪晏公以其言入奏上勅九卿議嗣後被災漕米銀或蠲或緩臨期奏請永著爲例祁陽公之

督閩也蘇祿國王進表使者報閩人某在呂宋嗾夷人劫貢物先生曰是詐也宜斥還其表聽候訶察則事敗矣公從之果來使譎言冀誣其仇先生之能仁民能決大事皆此類也先生不問旨畜雖享多儀皆畀綿莊已如不聞綿莊靜而峻先生孔揚采色和顏熙熙謙從者

皆憚伯之嚴就季之寬然平生于大義所在勿狎于不順雖賁育何搖焉中年耳聾絕意仕進有欲薦于朝者堅謝之所著塾敦說牧民瑣言皆歷言天下要務其明史略七十卷尤其

精力所注存也外金陵識古錄史學例議若干卷詳所自序中論曰周官稱公國有孤入王朝乘夏篆稱大客今之督撫昔之公也然則今督撫之大客或

卽當日之孤乎使先生以此致通顯出而有爲豈不更光于古然士君子有名之見存則所樹立者非己莫爲也如忘乎名而一以利物爲懷則古聖人皆因人成事而已不尸其功者

也老子曰爲而不有不難其爲而難其不有如先生者其近之矣

常孝子傳

孝子姓常名裕綸山西徐溝人生四歲孤母戴氏哀鞠子而撫焉家故織齋無存歲資母鍼

菴以供孝子侍側愉愉然不刻離既長以武舉授鎮海衛千總故事督漕者多風波危以故勿克迎輜輶視饑飲乾隆二十八年孝子畢官事還鎮人見孝子連日喜色溢眉宇異恆常時調之乃其母已來未一載母卒孝子雞斯徒跣不納勺飲將大殮攀棺號阿母不止聲盡血湧腸裂而卒越母亡纔三日

論曰禮稱毀不危身又稱五十不毀然臯魚立哭而死孔子與之傳稱胡女敬歸之子子野卒毀也人惜其不立以徵魯之衰孝子年五十矣不爲生孝甘爲死孝彼其心豈不知留其身以慰乃母于地下哉乃情極而禮忘焉非得已也王荆公之論李翱曰賢者過之翱之賢翱之過也因其過愈見其賢吾于孝子亦然

甯國府知府莊公傳

太守莊君從白門還宣州未半月訃至士大夫知與不知俱爲流涕聞其渡新河遇風舟幾覆食飲滯留服大黃臥便利不止果藥誤耶抑驚顛離胸以隕其生耶嗚呼求其故而不得者命也夫昔予知江甯今劉映榆學士介君於余長不踰中人而秀眉方頤言論風發從此交甚懽二十年來予雖居林下而君之黜陟升降以及其尊主隆民之治功有其子孫所不能知而予獨知之者然則君後人之來乞傳於予也固君志也君始知建德再知盱眙甯國泗州而終於宣州太守乾隆十年貴池民熊永安與金海鬪金傷重熊慮訟不勝會族弟長德病死乃斧尸誣金縣令謝錫伯廉其姦遂并誣謝落職而抵金罪民洶洶不平撫軍檄公與無爲牧王名標勘詰君檢腦骨陷於顱非生前傷鈎距旁證得喉訟人某而長德妻亦傷其夫尸之無故熏灼也跪謝告實熊乃伏法事雪皖江數萬人噪於時稱兩君子云盱眙大

水湖岸崩庭飲者相掬君雨立油衣而騎指揮水退民以爲神在泗州請免二十五年漕耗
大府聞諸朝

天子許之到宣州三月積案五百無留獄者乾隆十六年至三十年 天子四巡工部前總

督黃文襄公今相國尹公俱以絕世才總領百務而非君在側如失左右手一切山川舟車
供張儲侍君能先機置想後事補缺絲毫不掛於過差余嘗見其扈蹕時踞坐帳中皮硯膝
上十指雨下旁立文武內監數十人嚶嚶相環或催逼火急而君墨無停書筆無誤字面無
異色朝奏入夕報可其敏捷如此樂道人之善遇孤寒一才一伎必薦寵遇建德舊令於途
貧爲還帑而甯其歸性狷狹乘氣辨口小忤意輒以精神凌逼人雖貴游長官不少含忍以
致先爲泗州陳刺史排筭再爲安撫衛公劾奏至落職簿錄而卒之事皆無驗 天子閱其
勞每南巡必加擢遷自縣令而州牧而太守雖忤者聞之皆懃服曰莊君以才力取非福命
也然屢躓屢起危而後光家以是貧而精亦消亡矣卒年五十五君諱經畚字井五一字念
農乾隆二年進士

贊曰儒者多迂緩養名爲文俗吏所訾警得莊君而人不敢輕科目才之不可以已也如是
夫然君色焦然蹇蹇無已卒皆料量苛細馳逐雜務與書之云循吏者異也過此以往鞅掌
將畢而宣州民安風淳君必能修先王之政與民相和親而已亦將流覽其山川詠歌賦詩
以永嘉譽於來茲乃竟賚志以沒若蒼蒼者故限之而欲其止於是也福之方始壽之已終
悲夫

江甯兩校官傳

我國家百有三十餘載而江甯以校官祠於學者祇二人焉其一曰教諭湯先生諱偉字鵬乎宣城人康熙庚午舉人居官時年已七旬天倪甚和碌碌然不可見涯涘夏月短葛衣搖扇與羣兒嬉或上樹撲棗童子環啖之先生俯而笑曰盍留苦敗者償老子勞耶其風趣如此兵部左侍郎法海督學江南威稜言言所至不敢仰視初按江甯命報程生某劣先生搖首意若有所疑法呵之先生正色曰程生不特不劣且賢公命舉優耶今晚牒且上矣若以爲劣則公知之偉不知也法大怒叱先生出將劾先生江甯先輩蔡鉉升者與法有舊往見法爭曰公知程生所以劣乎生故獗者也嫉惡嚴過上新菴見僧奉富商木主與天子龍牌時生詆其妄粹而投之以故僧與商造蜚語陷生公得毋爲若輩所眩乎湯先生正人九學所推公不知敬何也法大慙悔三肅先生而謝江甯學舍穿漏每大雨先生持繖坐承雷下白髮淋漓客駭問則鬢鬢曰大成殿未修先聖露居而某敢即安乎上官及諸紳士聞之爭來營度構造終先生之世學宮煥然俸滿遷國子監典籍以篤老辭卒年九十餘其一曰訓導唐先生諱時琳字宸枚上海人康熙甲午歲貢飭躬訓士一衷于禮在官捐俸修前明周貞毅公祠去後諸生卽以先生與湯先生附焉乾隆二十九年邑有修學之舉將遷祠周公並遷兩先生訓導曹君懼兩先生之澤將湮也屬予作傳以永之予覽所持來湯狀甚具而唐事寂然無可記述以故筆澁不下者屢矣然竊念東漢諸賢瑰意琦行顯顯在人耳目而黃叔度以牛醫兒彌口無言一事無爲當時欽之者至以孔門顏子比之然則古之君子固有行而無迹者存耶抑動靜語默亦各視其時耶今人間方面大府在官赫然去則車未出城民已忘其姓氏者不知凡幾而此二校官獨能以一縷香食報於荒廬苜蓿之場可

知官不在大小惟其人人不在顯晦惟其真中庸曰誠之不可揜如此夫後之人聞兩先生之風可以觀可以興矣曹君倒冠而至偈偈然欲不朽先賢其立志非凡所及是亦昌黎所云得牽連書者名錫端字菽衣亦上海人

大理寺卿鄧公傳

乾隆三十九年春大理寺正卿鄧遜齋先生予告還蜀啟行之前一月從京師作書寄其弟子袁枚曰蜀道大難予偕汝衰未必再見卽生死音耗亦慮少通予生平出處本末惟汝知之詳盍爲我撰墓志以須枚聞命皇恐疑從先生之言則預凶非禮以不敏辭又恐非先生所以命枚之意而沒先生可傳之賢敬考古人文集爲賢者立傳不妨及其生存而爲之如司馬君實之于范蜀公是也先生蜀人聲望與范公相峙枚雖非君實請引此例以質先生謹按先生名時敏字遜齋四川廣安人高祖士廉崇禎進士以吏部侍郎從永明王入滇與李定國等同日殉難祖嗣祖邑庠生父琳以歲貢生任中江縣訓導生六子先生其季也雍正十年舉于鄉乾隆元年登進士入翰林七年遷侍講八年爲江南宣諭化導使十年遷大理寺正卿丁父憂歸里服闋奏請養母上許之二十六年太夫人薨二十九年先生入朝補原官先生純和介樸遇人媁媁無矜容躁顏于道義所在則凝然不可撓當其登九列時天子加恩邊遠之臣銳意用先生先生年纔三十餘一歲數遷旁觀辟睨以爲稍從容卽可宰輔而先生勿顧也歸依膝下忽忽二十年再入長安諸新貴少年望先生如過時古物爭避面擲揄而先生亦不樂與熟客昵退朝閉門與一卷書二三耆舊共晨夕而已大理古臯陶所爲權甚重元明以來一切決于司寇居此職者視若贅旒頭仰屋梁手批大諾相夸

爲識時務而先生每秋鞫苦心平反有所得必爭爭不得必奏雖 旨從中下有從有不從而同事怫然覺平林中僂此直榦鋤而去之乃善賴 皇上知先生深優容者屢矣今年以計典休論者疑先生受 主眷隆于始而替於終枚獨以爲不然夫陳寶赤刀天球河圖陳之東序照耀萬物恩也藏之典寶俾無玷缺亦恩也先生以萬里孤臣旁無憑藉而能委蛇卿班適來適去卒全名節以歸此非遭際 聖明始終眷護而能如是乎先生手札謙謙以未報 君恩爲愧枚又以爲不然夫建一議理一事此報恩之小者也重其身端其範以儀型百辟此報恩之大者也先生再入都時有要人怵之使往先生辭焉要人慍先生不悔其所以不受他人之恩者爲報 一人之恩故也無形之砥柱可以捭中流挽風氣矣而況古名臣有以七十起者有以八九十起者先生之齒猶未也則將來之報稱正無窮期而枚幸日暮毋死終將濡筆以俟先生自待待人以不欺爲主居官蕭散與在林下無異乞身治裝若脫敝屣然戊午校順天鄉試枚出其門其尤顯者爲滿洲阿公桂今太子太保定西將軍

廚者王小余傳

小余王姓肉吏之賤者也工烹飪聞其臭者十步以外無不頓逐然初來請食單余懼其侈然有穎昌侯之思焉喏曰予故饗人子每餐緡錢不能以寸也笑而應曰諾頃之供淨饌一頭甘而不能已於咽以飽客聞之爭有主孟之請小余治具必親市物曰物各有天其天良我乃治旣得泔之輿之脫之作之客嘈嘈然屬饜而舞欲吞其器者屢矣然其盞不過六七過亦不治又其倚竈時雀立不轉目釜中愴也呼張喙之寂如無聞映火者曰猛則燭者如赤日曰撒則傳薪者以遞滅曰且爨蘊則置之如棄曰羹定則侍者急以器受或稍忤及

弛期必仇怒叫噪若稍縱卽逝者所用葶藶之滑及鹽豉酒醬之滋奮臂下未嘗見其染指試也畢乃沃手坐滌磨其鉗鉅刀削筴帚之屬凡三十餘種皮而置之滿箱他人掇汁而揆抄學之勿肖也或請受教曰難言也作厨如作醫吾以一心診百物之宜而謹審其水火之齊則萬口之甘如一口問其目曰濃者先之清者後之正者主之奇者雜之眡其舌倦辛以震之待其胃盈酸以隘之曰八珍七熬貴品也子能之宜矣嗛嗛二卵之餐子必異于族凡何耶曰能大而不能小者氣羸也能嗇而不能華者才弱也且味固不在大小華嗇間也能則一芹一藟皆珍怪不能則雖黃雀鮓三楹無益也而好名者又必求之於靈霄之炙紅虵之脯丹山之鳳丸醴水之朱鼈不亦誣乎曰子之術誠工矣然多所炮炙宰割大殘物命母乃爲孽歟曰庖犧氏至今所炮炙宰割者萬萬世矣烏在其孽庖犧也雖然以味媚人者物之性也彼不能盡物之性以表其美於人而徒使之狼戾枉死於鼎鑊間是則孽之尤者也吾能盡詩之吉蠲易之鼎烹尙書之藁飫以得先王所以成物之意而又不肯戕杞柳以爲巧殄天物以鬪奢是固司勛者之所策功也而何孽焉曰以子之才不供刀七於朱門而終老隨園何耶曰知己難知味尤難吾苦思殫力以食人一肴上則吾之心腹腎腸亦與俱上而世之噉聲流歎者方與膺敗同齷也是雖奇賞吾而吾伎且日退矣且所謂知己者非徒知其長之謂兼知其短之謂今主人未嘗不斥我難我掉磬我而皆刺吾心所隱疚是則美譽之苦不如嚴訓之甘也吾日進矣休矣終於此矣未十年卒余每食必爲之泣且思其言有可治民者焉有可治文者焉爲之傳以永其人

石大夫傳

越之石氏居帝九阡水生者質美而狀多渺小其長子曰青豐且頎鯁理粹如越君欲以耀於上國乃命爲大夫聘吳吳闔閭甚文聞之喜曰石碣古純臣也寡人盍留其苗裔以爲國光命設九賓之禮宴大夫國中踐石以上者爭來窺觀大夫請曰士爲知己者死臣願留吳但臣南越之鄙人也敦顏而土色風範樸野難侍屏屢聞吳多子游氏之儒追琢其章願伉弟子禮而往其化臣哉闔閭許之當是時金壇叟王岫君年七十許取友必端以善琢磨人聞天下大夫往摠衣趨隅隕爾如委殺鋒砥角一聽叟之所爲月餘再召貌益澤色益莊奐若瑟若爛兮瑤珠之光吳子益喜命廬人爲大夫造屋漆欲測絲欲沉畢尙以瓊英飲以瀟灑之露臥以文貝之錦遂用事不離左右朝有子墨客卿者性堅執不肯下人見石大夫則形神消釋大夫益喜自負與何水部飲大醉遇管城公摔其頭溺之腹膨亨者數矣或譖於闔閭曰大夫居孔氏之門而陰與墨翟爲友摩頂放踵硜硜然小人哉且其形黑而津眼如鸚鵡必多詐扣之不能音是殆以飲水爲名而以貪墨爲實者也必斲之必逐之季札爭之曰微石氏吾何以爲札耶要知天下惟肉食者方無墨耳師曠稱國有五墨墨而墨子不與焉況其與交者哉昔者堯染於許由湯染於伊尹今大夫染乎墨翟亦猶行古之道也且以墨子之才見大夫猶日形其短而其他可知昔齊威王烹阿大夫而封卽墨大夫遂霸天下君盍封之卽墨以遂其志而成君之賢闔閭然之拜卽墨大夫賜西河黑水爲湯沐邑居無何上計秩滿將右遷大夫頓首謝曰臣聞知其白守其黑道家訓也茲者維元是宅臣將老焉吳子詳之不果遷大夫好修飾居吳三十餘年終日沐浴佩玉以質幹厚重不善舟車非有軍國大冊書大詞令不召見王或朝覲盟會亦不隨行性靜而壽其同官楮先生管城公

多病廢或更換至數十輩而大夫一與共事顏色不少衰後闔閭年漸老世子未生大夫侍側不知所終

南史氏曰俗傳石氏之顯始於女媧而盛於帝鴻氏遐哉難攷矣春秋隕石於宋五後之稱石氏者斷斷然僞託於宋以自夸然自宋碇之楚而後石氏之賢者無聞焉大夫能通上國友岫君交季札以成其名亦其所遭者幸也引北宮貞子故事賜生諡曰文端宜哉

短人傳

鎮江之短人曰趙元文年二十八長二尺許侈面博唇首如覆釜行則左右搖立久臀壓其膝兩手膠而拳揚州鄭守備貽其母千錢短人歸焉教之應對執箕膺搗短人性黠無他能屈一足跪客來輒自蠅局出而試之鄭復得女子一短如之將以偶焉短人辭曰不可短人天之僂民也有母在不能養而又養一短女子非所願也固與之將遁矣乃聽焉余過揚州短人出拜問安必朝夕至載以如白下自將軍方伯太守以下聞其短咸具篋來迎短人短人摩地鞠躄昂首酬對卑疵蠖趨轉圜如意皆大喜贈賜重積及歸褒衣大冠篋爲之重袁子曰禮之不可已也如是夫短人知禮人愛其短然則人之病何病乎其有所短耶

小倉山房文集卷八

錢唐袁枚子才

武英殿大學士太傅鄂文端公行畧

昔蘇軾不及見范文正公爲終身憾枚猶得見鄂文端公公方頤廣頰鬚髯若神色溫而語莊面兼春秋二氣自命過高常卑視古人氣出其上然於近今人才一善一技不肯忘以爲坐政事堂批勅尾非宰相事也宰相事在進賢退不肖而已賢不肖不可卒知則姑就其文章之表著者考之故每一鄉會試必採訪如飢渴胸中有某某皆非素相知及溫卷者己未禮闈撤公立宮門向閣學蔣公曰爾泰今年愧死闈後閱人文所卜悉不讎惟袁枚一人驗耳聞出君門下非君誰光我顏者蔣故公年家子聞甚喜而此科大總裁趙相國等相顧愕然枚聞雖感公竟不知公從何處見枚文也以公位尊亦不敢一謁謝壬戌試翰林翻譯枚最下等公所定也啟糊名大恨召枚往賜飯與深語且曰觀汝狀貌

天子必用汝汝爲外吏必職辦或憂汝能文不任吏事非知汝者嗚呼公之知枚如是枚旣早退不獲有所建白以彰公知人之明意欲報公以文章而公之行事又無從搜輯屢呼負今年秋公長子容安來督兩江將趨庭時所腹存手集者命枚具筆牘受辭乃得粗舉梗概以備國史之遺謹按公諱爾泰字毅菴滿洲鑲藍旗人西林者其舊居部落也高祖屯太率汪領七村人投太祖高皇帝曾祖圖捫襲佐領從征張理陣亡父拜官國子監祭酒公以舉人侍衛從

聖祖獵和詩稱 旨授內務府郎中郡王某至暴抗也屬公事不應召公將杖之公袖匕首

見曰士可殺義不辱王敬其強直謝之雍正元年典雲南鄉試還授江蘇布政使康熙末年
搢紳橫甚抗稅旅距小民用能吏趙向奎等一大創之設春風亭招致文士大將軍年羹
堯勢方張遣奴至蘇撫軍廖中門迎奴奴來見公公高坐召入問爾主安否奴見公甚莊嚴
不得已屈膝出年亦無如何巡撫雲南先是雲南貴州廣西三省苗屢撫屢反公奏欲百年
無事非改土歸流不可欲改土爲流非大用兵不可宜悉令獻土納貢違者勦疏上盈廷失
色

世宗大悅曰卿朕奇臣也此天以卿賜朕也命公進呈年月日與怡賢親王赴養心殿手
鑄三省總督印付公公知人善任賞罰明肅一時麾下文武張廣泗張允隨元展成哈元生
韓勳董芳等各以平苗立功致身通顯然土官自漢唐世襲二千餘年雄富敵國一旦入版
圖受官吏約束心終不甘諸漢姦又陰嗾之改歸後反者歲數起蜀之烏蒙窩泥滇黔之泗
城長寨車擺夷粵之西隆州相繼驛騷沉苗縛知府劉宏度於柱裸淫其女而頭曳之然
後剖心祭旗公慙怒次骨奏請褫職討賊贖罪 世宗以爲多一次變動加一次平定 優
詔不許公感 上恩益奮督軍鏖戰所獲苗皆刳腸截脰分挂崖樹幾滿見者胆裂繳上苗
賽弓刀鎗砲軍器無萬數丙午用兵至庚戌功成乃造橋雲貴交界處號庚戌橋開通黔滇
路八百餘里先是孟養苗與老撾國相連明正德間作亂兵部尙書王驥率兵十二萬平之
立石金沙江羣夷驚從古未有然歸後又叛至公而安營設汛如內地矣常親巡三省窮邊
六千餘里沿路諸頭目金環花衣焚香俯伏怒子莽子南詔諸國遣使上表獻倭錢寶布金
盤銅蟒等物皆離中原萬里者也新開古州丹江禾長八尺穗雙歧豆如栗子大 世宗批

筓云朕實感謝矣不知如何待卿而後心安封襄勤伯授武英殿大學士入都會准噶爾未平命公爲西路經畧賜金甲上方劍出巡阿爾蘇歸奏西夷未可卒滅擾敵中華無益果親王從西藏歸與公言同 世宗竟罷兵與天下休息公受 世宗非常之知入朝盡三鼓方出語祕外莫能知每具一疏雖請安慶賀及尋常筓子上必嘉獎忠誠頒示天下常云朕有時自信不如信鄂爾泰之專事無小大必命鄂爾泰平章以聞以故公所到處巡撫以下出境千里拜謁虔若天人從雲貴入相入總兵跪送泣曰公行矣某等無以報願臬公須臾望見顏色公未及答八人者素拳勇直前擊去輿夫蟒服珊瑚冠肩公而行數里外一總兵忽亡去七人喪耦不得已皆散行百里外見草中孔雀翎彪彪然膝行奔前抱公靴大慟聲盡咯血則前亡去總兵狼山鎮某也公亦潸然淚承睫下入 朝首薦之遷松江提督公以身殉國知無不爲一切嫌疑形迹無所避門庭洞開賓客車馬麻集漏盡乃已督三省時疏一切水道滇之昆明海口黔之磁硎入達粵之楊林諸河俱宣流貫行商貨鬻至貴州布政使申大成請軍田加稅將軍鄂彌達請丈欺隱田部議允行公惡其言利皆奏阻之尤護持善類前滇督高其倬楊名時俱獲罪楊待鞠而高修城公每見此二人談移日從者放儀仗駟睡或四散新撫朱綱欲入楊罪呼三木以待軍民洵欲爲變公力護持乃免楊夜夢羣蜂攢囓一神人以袖揮之散及見公如夢中貌貴州巡撫何世璜以名儒爲糧道李日更所劾公昭雪之經畧歸 世宗命戶部尙書海望爲治第凡什物檠禁盤匱械窰之屬必具已報齊矣命臬堂上几視之以爲窳敗大怒召海切責海叩頭請易乃已及公入朝奏事畢曰卿勿還舊居可赴新居手書公忠弼亮四字賜之侍衛十人捧而隨公公入 宸翰亦入聞府

中無園圃 命以藩邸小紅橋園賜公而中分其半爲軍機房公弟爾奇提督九門兼兵部尚書公力爭不可受直言雲南司道賀慶雲見大理令劉某獨曰某眼眯實不見慶雲公嘿然心嘉其直薦之枚初見公便問張奐稱羌夷一氣所生公報虐以威虔劉太重公笑曰五十年後自有定論也 世宗晚年召公宿禁中逾月不出人皆不測 上意公亦自危八月二十三日夜 世宗升遐召受顧命者惟公一人公慟哭捧 遺詔從圓明園入禁城深夜無馬騎煤騾而奔擁 今上登極宿禁中七晝夜始出人驚公左袴紅濕就視之髀血涔涔下方知倉卒時爲騾傷虹潰未已公竟不知也乾隆元年每行一政下一詔海內喁喁拜泣歌舞以爲堯舜復出有歸美於公者公悚然曰天生聖人社稷之福也老臣何力之有焉年六十九薨 天子親奠配享 太廟謚文端有奏疏詩集各若干卷子某某

光祿寺卿沈公行狀

公生沈章起元字子大世居太倉父宏受虎白鶴先生與相國王公談爲布衣交高憲不仕著述千萬言生先生愛其穎悟曰此兒須我自教也辭千金館穀閉門督課以康熙庚子舉人辛丑進士入翰林改吏部員外

世宗登極嚴六部缺主之禁不自首者死直隸學政缺主事發公爭曰此與六部缺主不同學政衛文缺主不能爲弊宜減死爲流 世宗嘉公有識召見授興化府知府當是時 世宗風聞閩中倉穀多虧 命內大臣伊拉齊等率謁選州縣六十餘員按覆之諸員爭得缺盤斛苛煩仙遊令某受代不收碎米公怒曰穀以備振也碎米亦可療飢斗升旣足何事紛紜諸大府無以難一時橋虔之風爲之稍戢總督高文良公奏開南洋已帖黃曉示矣有

旨禁內地商羈留外國高公猶豫命商人戚里具原船往回結狀方許放行公諫曰此法立將一船不得行高問故曰出洋者生死疾病無常數貨物利鈍無常期此豈內地戚里所能逆料而爲之具結者乎且公無開洋之示商無怨也今商旣得此好消息造船者費若干製貨者費若干忽以結狀相繫是明誘之而暗苦之也商必怨且走南洋者需北風今立春已半月倘結狀來北風不來彼失業商聚集廈門或爲盜賊害將何已言未竟高色變曰君欲云何曰據起元意但令出洋商自具狀以三年爲期如過期者不聽回籍卽以此狀咨部足矣故事驗放官興泉道及泉防同知也洋船水手多寡視樑頭大小民懼納稅大輒報小及出口船不得行乃求增水手同知張某馳啟督撫公攝道篆後到曰此啟誤矣水手定額工部所頒督撫不能增勢必咨請部示從此駁詰不已奈何俄而衆商具牒願自掉船免增水手張不可公夜叩張門曰南風起矣衆商懼不得行故爲此請君再固執必生他變張不得已驗船放行船中商果已集無賴袖瓦石將堵張門當是時微公幾不測初兩院閱張牒方仰天愕貽計無所出及此信聞乃大喜嘉獎者再而海口商民變詛爲祝懽舞者數萬人遷臺灣道臺田以甲論每甲十畝有奇 國初以鄭氏稅簿爲額較內地賦加重幸欺隱者多民不爲困雍正五年丈量法行民多棄產逃公請於高公曰人謂欺隱清可歲增漕十萬此妄說也第恐科則不定或比舊額轉少必干部駁爲今計宜令舊甲悉依舊數而丈出新田照同安下則起科俟欺隱盡清之後再將舊甲舊賦通勻於新田輕賦之上則國課民生兩無所病高從之至今臺灣民安其居國安縣民辛氏與顏氏有仇自殺其弟婦誣顏按察使潘體豐不能察具獄上總督命公覆訊公平反之潘怒以他事中公落職家居 今上元年

起用爲江西驛鹽巡道尋遷河南按察使直隸布政使內遷光祿寺正卿以老乞歸年七十
六卒公長身廣頰白鬚偉然待後進諸生慊慊如不及而於權貴處屹不可動在閩時巡撫
常安屬司海關吏白故事司關者到必先以名紙謁巡撫家奴公大駭不可一切驗放南面
指揮諸奴悚息垂手唯唯及常去後撫朱定元向公問常奴贓狀公不對朱強之曰起元但
知常公在關革除浮稅四千金此外非所知也戶部尙書海望奏清理直隸旗地有司違限
奉 旨嚴斥總督高公命公劾數州縣以自解公不可曰旗地非旦夕可清州縣方災何暇
了此公必劾官當自藩司始十二年直隸旱 駕幸東魯高公以迎轡事重命檢戶口十一
月開振公力陳民困甚慮不及待高愠曰必若此君自具奏公嘿然出苦言於清河道方公
觀承求通其意甚婉高亦悟卒從公言公性儉自奉一簋之外無他過菜口不言生產事歷
任脂膏而蕭然四壁於官爵黜陟視若浮雲初署臺灣知府到官日生番越獄前守劉某曰
獄匙未交是我責也公曰守印已受是我責也爭開失察職名大府嘉其有讓遂兩免之所
著學古錄四卷古文八卷詩四卷子某

記富察中丞四事

東粵近海南諸夷中國兩戒之守以廣州虎門爲限乾隆八年紅毛國伐呂宋勝之俘五百
人率其衆順帆泊虎門粵東大駭總督策楞召布政使託公曰外夷交攻揚兵我境勦之乎
聽之乎於國體奚宜公曰當使進表稱貢獻所俘五百人請公處分策笑有愠色喏曰君直
戲耳紅毛雖夷非癡人其肯以萬里全勝之師受驅使耶君言之君能之乎公曰不能固不
敢言策愈愠曰君果能恣君所請公笑曰無多請也請飭印知縣楊參將聽指揮六日內復

命印令者才而敏楊參將者修幹偉髯有將貌者也策許之公出召印令曰我欲使汝教紅毛國進表稱貢獻所俘五百人請制府處分印令驚如策所云公曰汝直未思耳紅毛伐呂宋涉大海數千里糧能足乎船漂浪擊風必損壞不於此修篷櫓其能歸乎此如嬰兒寄食於人小加裁禁立可餓殺何說之不能從制軍易吾言不問吾故未以此意曉之印令大喜奮曰如公言足以辦矣與參將楊領百人短後衣持彈據獅子洋而營焉密令米商閉戶遏羅紅毛人來探告之曰中國無他慮奸民欺汝外夷以行濫物誘汝錢故來相護耳紅毛人不解意去然望其炊烟漸縷縷希矣居亡何紅毛總兵求見坐定未言印令呵之曰中國久以虎門爲限條禁森嚴汝兩國交關不假旗疾過乃揚兵於此大悖我制府性暴好用兵我等未敢遽白所以守此者欲斷汝糧餓死汝然後白制軍紅毛總兵意大沮目參將參將禁聲鬚髯怒張叱嗟而已總兵愈恐伏地請曰誠然糧盡終非有心犯天朝也公幸赦之且教之令微露其意紅毛人泣曰若然誠天幸也請代申此言令曰不可吾爲汝告方伯大人方伯大人爲汝告制軍階級尙多通達尙難汝一旦失信則我等先爲汝獲罪故不敢也曰紅毛自具牒申請何如令爲不得已而強應曰可紅毛人抱弩負轡手加額匍伏進表貢所俘五百人乞制府處分策公大悅竟以五百人仍還呂宋而賞賜紅毛聽其還國越一年呂宋修怨於紅毛遣兵數千駐澳門揚言待紅毛來戰總督又詢公公曰此可一罵遣之也紅毛國小而強屢勝呂宋國大而弱屢敗以大國敗於小國慮四隣輕之欲洒削其恥又不敢從海直下挑戰紅毛故逗遛我地自張虛聲公前將紅毛所俘五百人送還伊國恩甚大可仍命印令往道破彼情歸曲責直彼雖夷必無辭而退如公言呂宋兵船即日搖櫓去

乾隆七年粵東旱攘竊填衢總督張示禁小錢且曰平糶三米廠宜減一糶者無過二升公聞大驚召廣州知府曰民情甚迫而糶廠轉減汝能保十日內無事乎曰不能五日何如曰不能公厲聲曰吾欲汝保十五日無事汝不能吾手斬汝知府踞而請曰今日難保而公云十五日何也公曰固也待吾言之制軍所以減糶者慮米不繼故留餘於倉也不知民情一變倉之餘官能留乎不若傾倒出之使民知之爲今計宜增一廠爲四廠宜不計斗石宜兼收小錢如制軍教朝夕難保如吾教十五日可保十五日中倉未竭雨必至民將大安第恐汝違吾言先白制軍致掣吾肘則事敗矣事敗民變均死也不如斬汝死死乃有名知府叩頭出如公教民懽聲如雷越八日天雨米尙餘五千石有奇雨後大官行香謝神將軍某謾曰吾欲絕公公驚問將軍曰當制軍令下時民心震動意在必亂吾臥夜不閉目公陰行善事消釋禍源而不先告我以甯我其能無絕交乎

公署廣東布政使前官程公仁沂被劾待罪廣州知府來手一册呈公曰此程獄詞公問訊乎曰未也然則何以有詞曰向例撫軍劾官無所待訊不過擬供狀具獄而已公微笑不應取所呈册付家僮內藏之知府探公色甚和必重違撫軍意而喜已署藩司之將卽真也媿然喜公正色責之曰訊百姓無先擬供法今訊藩司大員而汝乃代爲之供藩司汝長官撫軍亦汝長官殺長官媚長官於義何當我才短不能核人僞供故收藏之明日將此册奏皇上候 聖裁知府陰喝汗下長踞請曰某死罪此案良不實不圖公公正平恕一至於

此求賜還原册訊明再啟公笑曰能如是吾何求與册令出而遽呼騶從見撫軍撫軍者高郵王安國也初及程事王起立拱手曰微公言吾早羞死矣疏程陰事者程之同鄉同年知

縣某也訪之臬司某曰頗聞之訪之巡道某佯驚曰聞之久矣聞制府先奏矣予不得已奏出今聞諸員覬覦遷缺而然事大可疑我悔之折骨此段歉懷曾告阿將軍知之公不信請質我於阿將軍公曰改過不吝古大臣風也某請案覆再啟公甫出而知府已赴轅跪白程藩司事訊明全虛惟以平餘充公未奏擬罪公於奏程罪前十日先奏司庫動用平餘歷任官從不奏聞臣初到不敢蹈程某故轍致滋重罪仰乞睿示 上硃批此等小事任汝爲之但當慎重倘遇別案連及朕亦不能爲汝寬也後程奏入 上入公先言竟得寬減程夫人每早起盥沐畢嚴妝不食不言命家人舁至公生祠內焚香膜拜然後還家飲食笑言乾隆四年詔丁銀攤入地畝永爲例海內便之惟山西解州安邑五州縣不肯曰此地富民無田若攤丁於地是貧民代富民完糧也征輸者以爲然竟私用舊法七年 上風聞命巡撫某議覆巡撫請如新例公爲冀甯道爭之曰五州縣執貧富之說因循已久一旦改更民必變此事宜三思巡撫忿然召河東道某趣辦河東道心知不可而難於抵牾謾與兩司議曰事起解州牧今嚴牒下牧足矣牧懼即製巨梃千長枷百餘驅迫呼號安邑民揭竿起罷市燒城門毀公署而堵焉報急者日三四至巡撫擾急不知所爲命公領兵往公笑曰我願往然無兵我往有兵我不往巡撫問故曰彼蚩氓也雖生變尙懷狐疑聞有大兵則反志益決今合山西全省兵不過數千與我領者不過數百其足當五州縣人無萬數乎請單騎獨行而暗與我調兵符相機行事巡撫強應曰諾諸司道及府州縣餞公於郊酒行泣下若永訣者然公自省城至安邑一千二百餘里五日而至先張示稱爾曹皆國家愛養元元急迫生變我來非征爾欲平定安集之肯自首歸誠者赦民未曉公意閉堡門不出邑令來謁問

誰爲首對不知公曰可以知縣而不知乎曰聞某已被劾心灰且人衆無所於訪公曰以民變劾官 皇上必不悅或別遣欽差訊汝汝努力助吾何遽不爲福令拜謝出獲夜行少年訊之手疏七十二人喜甚不請於公遽往擒犯歸半塗追者至槍砲騰起弓役傷奪所拘七十二人入堡公嘆曰禍成矣庸人誤乃公事奈何將具牒請兵慮不發乃命副將率二百人傍堡而營告之曰不必戰但得堡中情狀即以聞如公言堡內人椎牛而囂公立召還以狀白撫軍請兵兵未至公陰念山西兵少且弱不可用而安邑民可先聲奪也乃檄取四城大砲及他兵器待用又雜取鋤犁鈎盾揚言將毀堡日昧巡撫羽檄下公發之蹙額歎曰孽矣殺一縣老弱安用全省兵耶吏肖聞之震恐轉相告語公遣人以酒千罌羊百羶犒兵命毋進城駐將軍廟聽召廟離堡三十里夜大風蹄踵蹂踏烟沙障天屠羊霍霍兵酣飲叫呼望者聽者人數莫辨堡中民股弁公笑曰此擒犯時也命知縣副將戎裝大呼堡前曰縛七十二人獻者兵立罷稍遲天明大軍至金鼓一震玉石焚矣堡中人不得已縛七十二人詣府受遣次日點兵三百人而已遠來足鞞腫手不能弓幸無所用歸營偃旗未幾天子果以巡撫爲民變劾官懦特命大學士訥親來翰駐省城訥別訪亂民五百檄公與副將擒訊公具牒稱七十二人尙多寃餘衆宜可闢畧訥愈怒文書火急且曰黨惡聽參公不爲動抵攔者三副將意不能無怯來矚公公無言副將曰公何無言公曰難言也以爲可耶妨五百民命以爲不可耶妨君官職民與官孰重君當自謀我不敢以己律君安得有言副將歎息而去五百人聞之泣曰攤丁非託公意擒七十二人非託公意我輩早從公言自首歸誠大家抱兒子臥矣今又以不擒犯故累公我山西以俠烈聞若然非壯士也請與偕出五百人竟面

縛出投公公不受投副將受之來謁公坐楨發於面公賀得大功君何不自喜副將手指天
歎曰五百人爲公來乎爲我來乎我武官也不折一矢而冒公功其如天何乃將安邑畏威
歸順之意啟訥公訥亦怒解命且保釋五百人父子妻女爭來迎歸扶攜歡叟祝延之聲數
里不絕獄具前七十二人者誅三人杖十人公諱庸字師健滿洲富察氏

小倉山房文集卷九

錢唐袁枚子才

書魯亮儕

己未冬余謁孫文定公於保定制府坐甫定闕啟清河道魯之裕白事余避東廂窺偉丈夫年七十許高睚大頰白鬚彪彪然口析水利數萬言心異之不能忘後二十年魯公卒已久予奠於白下沈氏縱論至於魯坐客葛聞橋先生曰魯字亮儕奇男子也田文鏡督河南嚴提鎮司道以下受署惟謹無游目視者魯効力麾下一日命摘中牟李令印即攝中牟魯爲微行大布之衣草冠騎驢入境父老數百扶而道苦之再拜問訊曰聞有魯公來代吾令客在開封知否魯謾曰若問云何曰吾令賢不忍其去故也又數里見儒衣冠者簇簇然謀曰好官去可惜伺魯公來盡訴之或搖手曰咄田督有令雖十魯公奚能爲且魯方取其官而代之甯肯捨己從人耶魯心敬之而無言至縣見李貌溫溫奇雅揖魯入曰印待公久矣魯拱手曰觀公狀貌被服非豪縱者且賢稱噪於士民甫下車而庫虧何耶李曰某滇南萬里外人也別母遊京師十年得中牟借俸迎母母至被劾命也言未畢泣魯曰吾曷甚具湯浴我徑詣別室且浴且思意不能無動良久擊盆水誓曰依凡而行者非夫也具衣冠辭李李大驚曰公何之曰之省與之印不受強之曰母累公魯擲印鏗然厲聲曰君非知魯亮儕者竟怒馬馳去合邑士民焚香送之至省先謁兩司告之故皆曰汝病喪心耶以若所爲他督撫猶不可況田公耶明早詣轅則兩司先在名紙未投合轅傳呼魯令入田公南向坐面鐵色盛氣迎之旁列司道下文武十餘人睨魯曰汝不理縣事而來何也曰有所啟曰印何在

曰在中牟曰交何人曰李令田公乾笑左右顧曰天下摘印者甯有是耶皆曰無之兩司起立謝曰某等教勅亡素致有狂悖之員請公并劾魯付某等嚴訊朋黨情弊以懲餘官魯免冠前叩首大言曰固也待裕言之裕一寒士以求官故來河南得官中牟喜甚恨不連夜排衙視事不意入境時李令之民心如是士心如是見其人知虧帑故又如是若明公已知其然而令裕往裕沽名譽空手歸裕之罪也若明公未知其然而令裕往裕歸陳明請公意旨庶不負大君子愛才之心與 聖上孝治天下之意公若以為無可哀憐則裕再往取印未遲不然公轅外官數十皆求印不得者也裕何人敢逆公意耶田公默然兩司目之退魯不謝走出至屋雷外田公變色下階呼曰來魯入跪又招曰前取所戴珊瑚冠覆魯頭嘆曰奇男子此冠宜汝戴也微汝吾幾誤劾賢員但疏去矣奈何魯曰幾日曰五日快馬不能追也魯曰公有恩裕能追之裕少時能日行三百里公果欲追疏請賜契箭一枝以為信公許之遂行五日而疏還中牟令竟無恙以此魯名聞天下先是亮儕父某為廣東提督與三藩要盟亮儕年七歲為質子於吳吳王坐朝亮儕黃袂衫戴貂蟬侍側年少豪甚讀書畢日與吳王帳下健兒學羸越勾卒擲塗賭跳之法故武藝尤絕人云

書麻城獄

麻城涂如松娶楊氏不想中歸輒不返如松嘆之而未發也亡何涂母病楊又歸如松欲毆之楊亡不知所往兩家訟於官楊弟五榮疑如松殺之訪於九口塘有趙當兒者素狡獪謾曰固聞之蓋戲五榮也五榮駭即拉當兒赴縣為證而訴如松與所狎陳文等共殺妻知縣湯應求訊無據獄不能具當兒父首其兒故無賴妄言請無隨坐湯訪唆五榮者生員楊同

範虎而冠也乃請禡同範緝楊氏先是楊氏爲王祖兒養媳祖兒死與其姪馮大姦避如松
毆匿大家月餘大母慮禍欲告官大懼告五榮五榮告同範同範利其色曰我生員也藏之
誰敢篡取者遂藏楊氏複壁中而訟如松如故逾年鄉民黃某瑾其僮河灘淺爲犬爬瞰地
保請應求往驗會雨雷電以風中途還同範聞之大喜循其衣衿笑曰此物可保與五榮謀
僞認楊氏賄作李榮使報女屍李不可越二日湯往屍朽不能辨殮而置揭焉同範五榮
率其黨數十人闕於場事聞總督邁柱委廣濟令高仁傑重檢高試用令也覲覲湯缺所用
件作薛某又受同範金竟報女屍助有重傷五榮等遂誣如松殺妻應求受賄刑書李獻宗
舞文件作李榮妄報總督信之効應求專委高翰高掠如松等兩踝骨見猶無辭乃烙鐵索
使踞肉烟起焦灼有聲雖應求不免皆不勝其毒皆誣服李榮死杖下然屍故男也無髮無
脚指骨無血裙袴逼如松取呈如松脅亂妄指認抵攔初掘一冢得朽木數十片再掘并木
無有或長髯巨靴不知是何男子最後得屍足弓鞋官吏大喜再視髑髏上鬢鬢白髮又驚
棄之麻城無主之墓發露者以百數每不得又炙如松如松母許氏哀其子之求死不得也
乃剪已髮摘去星星者爲一束李獻宗妻刺臂血染一袴一裙斧其亡兒棺取脚指骨湊聚
諸色自瘞河灘而引役往掘果得獄具署黃州府蔣嘉年廉其詐不肯轉召他縣件作再檢
皆曰男也高仁傑大懼詭詳屍骨被換求再訊俄而山水暴發并屍衝沒不復檢總督邁柱
竟以如松殺妻官吏受賂擬斬絞奏麻城民咸知其冤道路洶然卒不得楊氏事無由明
居亡何同範隣嫗早起見李榮血模糊奔同範家方驚疑同範婢突至曰娘子未至期遽產
非嫗莫助舉兒者嫗奮臂往兒頸拗胞不得下須多人掐腰乃下妻窘呼三姑救我楊氏闖

然從壁間出見嫗大悔欲避而面已露乃跪嫗前戒勿洩同範自外入手十金納嫗袖手搖不止嫗出語其子曰天乎猶有鬼神吾不可以不雪此冤矣即屬其子持金訴縣縣令陳鼎海甯孝廉也久知此獄冤苦不得聞聞即白巡撫吳應棻吳命白總督故總督邁柱聞之以爲大愚色忿然無所發怒姑令拘楊氏陳陰念拘楊氏稍緩或漏洩必匿他處且殺之滅口獄仍不具也乃僞訪同範家畜娼而身率快手直入毀其壁果得楊氏麻城人數萬歡呼隨之至公堂召如松認妻妻不意其夫狀焦爛至此直前抱如松頸大慟曰吾累汝吾累汝堂下民皆雨泣五榮同範等叩頭乞命無一言時雍正十三年七月二十四日也吳應棻以狀奏越十日而原奏勾決之旨下邁柱不得已奏案有他故請緩決楊同範揣知總督意護前乃誘楊氏具狀稱身本娼非如松妻且自伏窩娼罪邁復據情奏天子召吳邁兩人俱內用特簡戶部尙書史貽直督湖廣委兩省官會訊一切皆如陳鼎議乃復應求官誅同範五榮等

袁子曰折獄之難也三代而下民之譎觚甚矣居官者又氣矜之隆刑何由平彼枉濫者何辜焉麻城一事與元人宋誠夫所書工獄相同雖事久卒白而鞫轉變幻危乎艱哉慮天下之類是而竟無平反者正多也然知其難而慎焉其於折獄也庶矣此吾所以書麻城獄之本意也夫

書潘荆山

潘荆山諱兆吾浙孝廉也靜深有謀浙閩總督滿保辟入幕府康熙五十四年臺灣反以立朱一貴爲名朱農家子幼養鴨爲業每叱鴨鴨皆成伍路不亂行鄉人異之游民之無賴者

倡爲亂擁一貴據南路殺守備及官兵二百總兵歐陽凱副將許雲討賊戰死臺灣陷事聞省城大震時漏下二鼓滿公不知所爲登荆山床爲訣哭聲烏烏荆山披衣起笑曰公止哭賊即平矣臺灣賊皆烏合何能爲第兵機貴速須盡此夜了之公曰如何曰公持印荆山持筆兩侍兒供紙墨羣奴張燎聽遣足矣如其言書一牒下中軍曰發兩標兵各千五鼓集轅旌旗器械戰船缺者斬一牒下司道曰運糧若干集厦門聽取誤者軍法從事一牒下府縣曰明早部院出兵送者斬各吏民安堵毋動荆山每書牒筆颯颯如風雨畢一紙請公加印印畢即發未三鼓而部署定荆山復解衣臥哈臺大鼾黎明拔營行兩日至厦門時承平日久兵不善櫓槳公憂之荆山下令傳呼曰凡海賈船能捐貨載兵者與五品官有一賈奮前即褫守備蟒服與之繼來者分給牌箭豹豸繡補衆賈大喜爭自掉船船銜尾布列兵依隊而上不敢譁甲光耀日五日抵鹿耳門賊大怖以爲神兵從天而下駭散無鬪者互相攻殺守紅毛城僅十六人誅之進勦竹箐城禽朱一貴檻車送京師兵不血刃糧不支給凡七日而臺灣平滿公欲奏荆山功荆山辭曰某姓孀非能吏事者也賊平仗國家威靈不可貪天功襲人爵請事公終其身滿公卒潘復佐浙督李公衛以名聞

李敏達公逸事

康熙末各省錢糧多虧

世宗詔清查天下震懾公總督浙江聞之詣內幕問策皆瞠不語公曰不請朝臣來天子弗信朝臣至而督撫無權事敗矣宜速繕一疏極言浙省廢弛久誠得內大臣督治甚善但內臣初至未得要領臣身任地方需臣協理事裁辦疏成馳奏即詐稱生日開筵受賀浙中

七十二州縣無不齎至者公張燈陳百戲止而觴之召諸州縣至密室語曰清查使者至矣汝庫虧絲毫勿欺我我能救汝否者發露被誅勿我怨皆泣謝曰如公教歸皆核冊密呈其無虧者具狀上亡何奏下許公協理清查大臣戶部尚書彭維新實來先至江南江南督撫不敢闌語一聽彭所爲彭天資險鑿鈎考煩密民吏不堪州縣擬流斬監追者無算畢到浙氣驕甚公迎見即持 硃批示之曰朝廷許衛與聞公勿如江南辦也彭氣沮稍稍禮下於公公置酒宴彭半巡執杯嘆曰凡共事者未有不爭者也某性麤好與人角屢蒙 上諭今誓與公無爭而後可但不知如何而後可以無爭彭曰分縣而辦何如公曰善呼侍者書州縣名若干揉小紙如豆髹盤盛與彭起分拈之暗有徽記彭不知也其虧者歸公其無所虧者歸彭彭刻苦辜較手握算至胼起卒無所得而公密將贓罰閒款鹽課贏餘私攤抵矣故使人問曰有虧否何如彭曰無之彭問公公陽爲喜出意外者而應曰亦無有也遂兩人同奏浙省無虧 世宗大悅語人曰他人聞清查多憂愁獨李衛敢張燈宴彼教督有素自信故也晉秩太子太保賞賜無算各官俱加一級江南之人望如天上河東總督田文鏡柄用時忌公暗劾公 上不爲動田懼轉來結納伺公居太夫人喪遣人以厚賻弔公罵曰吾母雖餒不飲小人一勺水也麾使者於大門之外而投其名紙於溷中然性極服善一日坐堂上命吏胥田芳作奏請封五代田不可曰封典止三代無五代芳不能作此奏固命之對如前公大怒罵曰畜產例自我創何干汝而逆我田遽起立勃然曰公大誤公怙 天子一時寵忘王章芳故曉公公當謝芳乃辱及其親何也且公爲人子孫封三代而猶未足芳亦人子孫未封一代而公以畜產寵秩之何用心逆人道耶芳殊不服芳殊不服公素負氣忽公

堂爲吏所折窘不知所爲強復怒曰便是我誤汝不服奈何曰公大人也芳小吏也豈特公
譽芳芳無如公何即公杖死芳芳亦無如公何所可惜者大人之威能申於小吏而小吏之
理殊直於大人耳言畢竟走出公默然顧左右亂以他語而罷是晚召芳芳疑公畜怒將陰
禍之入色如土公握其手笑曰汝有膽識而辱爲吏可惜吾貸汝千二百金納縣丞他日事
上官亦以直道行之田泣謝得富平縣丞遷鳳翔令以賢聞

傅卓園者名魁公標下卒也少無賴以材武入勇健營涿州大盜李自洪力敵千人匿大邵
村牛四家公命卓園往擒卓園請標下李昌明及韓景琦俱公笑曰汝往能擒此賊昌明往
非昌明殺賊則賊殺昌明韓景琦往必誤乃公事不信如汝意試之卓園夜至牛村自洪方
謀劫再貢生家未發卓園破門入昌明舞雙鎗先登賊暗中斫之傷大呼仆地卓園繼進門
小器無所施棄其戟手搯賊陰而曳之小腸出矣賊抱卓園刃其背萬千幸衷甲不死然骨
入者寸許卓園繞賊腸於臂至三匝賊猶能運刀韓景琦急來助昏黑不辨捧傅足以爲賊
也而縛焉傅自念受兩人敵必敗不得已逆而踐之繩三重皆斷韓仆出數步外天漸明三
人共縛盜獻之轅公大笑曰吾所料何如盜且死願行刑者曰吾爲盜三十年殺人如草官
兵屢捕無敢格鬪今擒我者壯士也願一見而死或指卓園盜運日久之嘆曰我久當死死
於足下值矣我所遺寶刀知足下來哀鳴三日宜贈子佩之我死不悔爲盜悔不知天下之
尙有人也

鄂文端公逸事

張廣泗之征丹江也來辭公牘記軍事數條將請公處分公餽諸燕寢竟日筥絃鏗鏘口不

及軍事張不得已請問公問何爲曰軍事公正色曰吾以汝爲能辦賊者故用汝不料汝非將才也用兵之道變化無方故曰闔外將軍主之其隨時制勝豈我與汝今日所能預定耶惟兵少或糧不足者當問總督而我部署久定故懼而飲汝汝尙何言諸將聞之皆心折駭服初廣泗知思州府說公取古州八萬云其地廣千餘里在黔粵之交分兩省觀則在外合兩省觀則在內廣泗乞到黎平探知形勢可以奏功公卽調廣泗知黎平黎平諸葛營者古州形勝處也後倚大山西接懷遠中有五丈臺登之見大小丹江苗俗傳孔明登後無人登登輒頭痛廣泗到卽輕騎登臺苗望見廣泗指揮臺上驚將圖已卽聚衆張礮下坡處廣泗心動不肯下宿於臺次日五鼓大霧從山背銜枚下苗驚以爲神歸盡得其出入要領啟公招降都溶兩江苗而征丹江九股苗世宗慮廣泗新進好事命內臣牧可登春山至軍營參謀至丹江已平世宗大悅授廣泗貴州巡撫召公入都公薦廣泗爲巴里坤副大將軍征阿拉蒲坦先是大兵屯巴里坤山北人馬多凍死廣泗往請於大將軍查郎阿曰賊不畏冬以能移家故也賊能往我亦能往盍學賊移家法覓向陽有水草處立營查不信廣泗率所領兵如寇法其年兵無死者馬驢肥如初敗賊於木壘城殺無算生禽六百人世宗大悅命總督湖廣會古州苗反煽連楚粵諸孽陷思州清平世宗切責公命刑部尙書張照都統德希壽督師貴州照等奏改流非策世宗愈怒廣泗奏善後失宜皆臣之罪願革職效力軍前會今上登極加廣泗七省經畧銜督兵貴州羣苗呼曰上諸葛營老子又來矣慎勿與戰望旗幟輒走廣泗奏張照等所以無功者分守兵戰兵爲二故也黔兵本少而又分之何以辦賊請調全省兵齊集鎮遠以通雲貴往來之路上許之廣泗率三萬兵張強

弩追苗至凱里香山山有牛皮箐當四山之凹深數百丈闊三里苗避弩爭走箐下廣泗據山築長圍四面環之苗無所得食相枕籍餓死者四十餘萬人三省猺獠爲之一空嗣後古州雞尾擺處俱改衛設屯而苗羣亦不復反矣哈元生者河間人也高鼻長髯以守備從公征苗每戰輒陷陣擢安籠鎮總兵烏蒙之役賊數萬營官防海子張旗鼓噪元生率兵四千討之賊有名黑寡者號萬人敵每大呼鷹爲退飛戰日持長槍直犯元生元生以左手格槍右手拔箭射之槍應手斷而黑寡業已受箭落馬一目出矣元生斬首揭竿上羣賊奪氣退走追至得勝坡別寨苗起應之聚衆鳳凰山元生知衆寡不敵乃密令參將康世顯等夜率土兵暗繞賊營分左右隊伏山下約曰聽號礮起次日黎明元生率兵挑賊盡出官兵不動待賊將近忽礮發聲元生舞雙刀衝陣山後奇兵突至賊敗走追之盡俘其衆元生手擲一賊於空中高數丈以刀揮之作數段墜羣賊大駭以爲神勇嗣後望見安籠鎮旗纛卽逃無敢格鬪者 世宗召見賜宴以元生回部人不漢食命光祿寺別具特羊之餐二人者至公家皆供掃除之役若隸子弟然

稗事二則

尹文端公母徐氏江甯人爲相國小妻相國家法嚴文端總督兩江夫人猶青衣侍屏園文端調雲貴入覲 世宗從容問汝母受封乎公叩頭免冠將有所奏 世宗曰止朕知汝意汝庶生也嫡母封生母未封朕卽有旨公拜謝出相國怒曰汝欲尊所生未敢我而遽奏上乃以 主眷壓翁耶擊以杖墮孔雀翎徐夫人爲蹠請乃已 世宗聞之翌日命內監宮娥各四人捧翟第單衣至相國第扶夫人榻上代爲櫛沐絃服豫飾花釵爛然八旗命婦皆

嚴妝來圍夫人而賀者相環也頃之滿漢內閣學士捧 璽書高呼入曰有 詔相國與夫人跪乃宣讀曰大學士尹秦非藉其子繼善之賢不得入相非側室徐氏繼善何由生著勅封徐氏爲一品夫人尹秦先肅謝夫人再如 詔行禮宣畢四宮娥擁夫人南面坐四內監引相國拜夫人夫人驚蹴踏欲起四宮娥強按之不得動旣乃重行夫婦合巹結褵之儀內府梨園亦至管絃鏗鏘肴烝紛羅諸命婦各起持觴爲相國夫人壽酒罷大懽笑去後三十年文端側室張夫人受封文端謝恩奏及之 上曰朕實不知 先帝有此事乃竟暗合豈非卿家運耶公繼室鄂夫人鄂文端公猶女也兩文端相見鄂老矣嘆曰吾日夜思抽身退未知能否夫人曰女聞古之君子事君能致其身又曰明哲保身未聞有抽身者兩文端爲之莞然

田文鏡總督河東以不喜科目聞王士俊宰祥符謁田田問出身王眉蹙口澀若爲萬不得已者而對曰士俊不肖某科翰林也田以爲測己愈惡之每見嘖喝吹毛索瘢王憂懣不食幕府客裘香山高士也被酒大言曰制軍有意相督過將早晚劾公公去無名可惜不如擇一有名事去問何事曰今新增河南贓地稅民不能堪公以狀啟田田必據此劾公公雖去公名傳矣曷若萎媮授印低頭出衙乎王深然之繕稿數千言通牒大府布政使楊文乾心曠田所爲而屈於勢不能言忽得王牒驚曰此何時尙有奇男子耶呼僮焚香供牒再拜遲明田果具疏劾王楊佯助田怒謾曰狡哉王令知公憎之故借此求名若據彼牒劾奏是落伊度內也且罪止罷官不如姑舍是而別摘他罪中之使轉身不得田頷之王感楊恩私誓如父子然亡何 天子擢楊巡撫廣東士俊送出境悲不能自止楊亦泣然曰事未可知何

忍遽別姑行一驛乎既又留之曰事未可知姑再一驛乎王自度無全理憫惻相隨忽見北來飛騎捧黃封授楊楊下輿北向九叩首招王曰我乞汝同往廣東天子許以府道用矣速歸辦裝可也王至廣東授肇高廉道尋擢布政使田文鏡卒竟督河東代其位

小倉山房文集卷十

錢唐袁枚子才

王介社詩序

吾不識漢管公明作何狀至於攬鏡自照傷不永其年其言卒驗然史稱其才幾亞管蕭矣今有人焉曰虞山王陸禔字介社貌瘠而修如枯藤將弛兩瞳子凸於眶欲墜地碎其詩悼往紀今能曲折以神赴歌之葩華滌布若穆羽之調家貧母夫人年七十介社挾一鞭一筆遊前年將之楚過余道別討論諧諱相樂也已而自戚其貌對壁間鏡戲曰而小子其窮哉乃別去長沙令某聘爲記室未半年病遽控舟歸未半途死嗚呼貌之徵何其速也昔公明壽四十介社僅三十三然則今之天更嗇於昔之天也公明文采無所表見介社詩大噪於時似可以其名之羸補壽之縮然形而下者貌也形而上者才也貌之徵宜天宜窮才之徵宜顯宜壽宜彰施休明兩者皆天所與而一驗一不驗使人咨嗟涕洟則又胡不并其才而靳之也介社歿後予方索其詩其弟次岳自虞山來以詩六卷屬余校定而付之梓嗚呼此則人所爲而不聽命於天者矣

送醫者韓生序

仁無術而不行堯舜之政周孔之教神農之藥皆術也皆所以行其仁也使堯舜周孔神農雖仁其民如嬰兒而無術以及之其奚能爲雖然後之人爲政教醫藥其厲民加倍焉豈古人之術不仁歟曰仁者見之謂之仁也見何在志是已孔子稱志於道孟子稱尙志又曰夫志氣之帥也志之所在不特慧力與俱而精誠之至天亦相之今之爲政教醫藥者推其志

果可以見周公孔子神農乎然則其術之不工也乃其志之不仁也韓君宗海挾醫術來白門白門之人或疔瘍或宿瘤或隘疾而腰急或創未合而陷焉以深或申且呼譽嗷嗷然目不得一映君治之脫手愈用是名稱噪於時韓君大言曰得諸公千譽不如得隨園一序故人蔣用菴爲通其意甚婉余以初測交故筆染復休者屢矣亡何相遇於用菴處極道所遲遲序君意君又大言曰吾索序非欲繩我美也顧吾懷欽欽在抱無有能宣究之者吾始任戴冠即通儒兼通鑄凝家言以爲均不足以仁吾氓故溺苦於醫爲品庶每生計此志也非公聲之於文則誰了我於冥冥者嗟乎君之志如是君之術可知且夫古之醫者皆刀錐鍼砭播引毒熨之爲非徒恃湯液也故藥暝眩而效亦易徵今轉科而別之內治爲優外治爲細是何異爲政教者抱黃圖赤縣爲兢兢而遺視九竇八陔耶君之術能治內而專以治外名是則君之所以取效致功卽其所以探本提要也余悲夫世之人知君術之工而不知其所以工故序君說以送君而兼以勗世之行仁者擇術者立志者

重修江甯縣志序

志江甯難於治江甯治之者行其當然之事志之者紀其已然之跡當然者以意爲已然者不可以意爲然非志之詳則治之亦必不備其道又若相須者然周官誦訓掌道方志以詔觀事以知地俗蓋自古稱焉江甯古帝王都頽垣片瓦中具史書數百萬言而上元一邑又至唐而分將獨自爲書其能無屬以糲乎其能盡萬物之理而不失其度乎其能廉而辨若比疎乎其能書出而人齊其口不相訾謷乎江文通云作史莫難於志余故知難而退者屢矣鄉之先生進而言曰邑志不修垂九十年此其間之經人咳數風化芳臭明府忍聽其變

革堙替而愬然置之乎明府於一切簿領能挈其最凡曠分殊事其於志江甯也奚獨不然邦之人願供束脩延名宿以先焉余曰唯唯因衆人之資藉秉筆者之才借山川都會之勝以成余之名又得時時覽其風土人事以考其政治之得失此梓人之不斷而書名者也何其幸也開局後成卷帙若干歲周乃付於梓嗚呼余舊史官也三年侍金馬門不能滯半管墨酬主知而今擁吏卒學牛馬走乃得爲一邑成完書不可謂非遭逢之盛然而其治江甯者殊難自信則志江甯者益可知也或千百世後覽是志而善之而轉疑今日之治江甯者之無甚過差則是諸君子之助而非余之功卽書其意以弁羣言之首

送望山相公入閣序

置一人爲九卿六曹之官其不可不可得而知也置一相於九卿六曹之上而不可不可天下之兒童走卒已知之矣是何也百官論才宰相論望才可表見於臨時望必積累於平日此三公之位之所以難也雖然養望難副望尤難今夫雲人皆知其能爲霖也然不過起於山中覆於一方則望之者欲亦易饜若夫蓬蓬然起於泰華之阿彌漫於九天之表則望之者咸引領於無窮倘沛然作雨而亦區區霖霖已焉則又安貴夫垂天之雲哉枚弱冠遊京師聞論相者輒曰尹公尹公今枚年五十公纔入閣然則公之望久矣望如公而何待於枚言亦惟望如公而枚又安得無言從來儒生之見往往與在位者相儼而馳非在位者之過也一旁觀一當局旁觀者好以太古迂遠之言靡切左右而勿度今所能行者陳之則不如其嘿而已也夫大臣之道豈一定哉周公教成王所其無逸而召公則教之以伴奭優游宋璟諫明皇母幸東都而姚崇則勸以東巡無害卒之召公大聖也姚崇大賢也其若是何哉

要在誘君心於當道而於己不失其正而已矣唐陽城一諫官耳尙不肯爭細事以累名宰相非諫官比也將朝夕坐論與社稷同休戚者也行而世爲天下法則行焉言而世爲天下則則言焉或時之未可勢之未宜則所貴乎積誠悟主伺間責難而不在乎改一成法增一科條也天下人信公之深愛公之切必揣摩而相告曰以公入相而未有所聞於人間也其必嘉謨入告而不使外人知耶抑必重其身以有待而將大有造於將來耶如是十年天下之望公者未有旣也則公之望雖未副也而卒無損也所慮者矜報恩之迹急任事之名於其遠者大者或不敢探懷以取則旁引雜出而轉多瑣屑紛更之爲使天下望此而得彼望大而得小而天子亦知其底蘊之已窮他日有言必厭而輕之矣平素之望豈不危乎以公之明必不出此而枚所以譏諷者恐公虛懷太甚竟忘其負荷之重若此而亦等於尋常作相者之所爲又恐公一事一言必先立身於無過之地而周旋曲折轉足以招人之疑不知過也者愈避之而愈至者也古大臣但知有國不知有身不知有身何知有過甚至機失謀乖猶戀戀而不能已而况躬逢一德明良之盛也哉枚見天下之人望公已甚而枚之望公又更甚於天下之人故於公之入閣也陳所慮以規公亦書所見以質公

送陸明府入都序

余不宰江甯久矣後之宰是者皆才出余上皆交好而心之所尤折者爲蘭邨陸君君喜余古文常曰他日得子文序我可乎余雅欲序君而苦於不得當以報乃諾而俟焉今年十月君以捕亡事受天子知將召對有高爵之遷茲事非君所甚矜喜而忽大恩壓已轉項項不決邦之人亦若有卹然者余爲序而釋之曰羿之彎弓也惟巴蛇九日始足盡其殼耳乃

偶中燕雀而名因之大彰羿之心非所冀也然天下事固有感在此而應在彼者豈獨射然乎或智人也而以愚獲術或惠人也而以猛立功徒觀其迹未有不適適然疑者不知不膠轛而錯綜之不足以彰造物報施之巧君善讞決大府有疑難事必委君決君所至皆仁自持或罪至虔劉而一旦釋甯其家者纍纍然此皆宜受天子知者也亦天子知之必嘉予者也顧名不上聞雖堯舜無由知而平素闇然之勤勞天必欲光明之爲循吏勸則不得不借一二事以達九乾而垂清問且以見聖天子留心人才小善不遺至於如此凡爲臣子而不以積誠勤事求知妄挾他途干進者皆惑也且夫學之與仕有二理乎曰無有也書稱學古入官議事以制是也生之與殺有二理乎曰無有也孔子稱惟仁人能好人能惡人是也陸君口不離先王之言遺蛇其容常爲文俗吏所擲揄一旦璽書徵召儒者榮之然其爲政暖暖姝姝一以生人爲事者也乃偏以戮人見知君之才雖顯而君之心將隱矣予竊託於君子表微之義書其故曉邦之人而因以慰君之行焉

西阪草堂圖詩序

慶生日古無有也慶生日而歌詠其所居之堂以爲慶古尤無有也雖然周雅曰秩秩斯干悠悠南山晉獻文子成室晉大夫發焉張老爲之善頌而善禱焉是皆就其所居以爲壽意也宣州張先生芸墅當不親學之年其戚里勿介爵勿祝釐并不爲揚詡而第爲所居之草堂徵詩蓋雖舉俗之文而亦猶行夫古之道也先生家有貞介堂爲前明司李公遺迹先生宦遊歸益宅城西鬻茅爲室顏曰西阪居而樂之聞之先民曰相馬以輿相士以居居也者君子之所不苟也衛公子荆善居室庾誥十畝之宅山池居半皆以居傳者也然混元運物

流而不處曾幾何時東閣變爲馬廐者多矣而士大夫一解巾褐又往往招之不歸以致田園就蕪雖先人之舊廬亦或鞠爲茂草未見有培基沃本如先生之纏綿者先生甫中年卽伏而不出肆心廣意鉛槧於斯若忘其爲司馬官南越者然無他爲草堂作主人故也予雖不獲登堂猶憶甲戌歲與先生同遊攝山討論竹素窮極要眇意欲相引爲曹聲名流千萬歲今忽忽十五年堂中之著書若干尺可想而知也他日堂之因先生傳決也然而善邇卽所以致遠獲後方可以承先張氏舊族得先生先生嗣君得慕青太史肯堂者未已肯構者又來較元亭之有童鳥禮堂之有小同尤爲光耀然則以他事壽先生先生勿樂也以茲堂壽先生先生樂也雖欲不歌詠也得乎於是堂之景董尙書圖之堂之顛末先生記之詠茲堂之詩文小子序之

聞茗厓竹洲詩鈔序

前年冬楊君洪序來山中授一編曰此吾師茗厓先生詩也公爲序將刊焉楊固不知讀先生科舉文者枚也先生姓聞名元屨樵李人雍正進士當枚讀先生文時年十二隔三十三年而又重讀其詩驚且喜以爲有文字緣者莫先生若也楊君授詩後占卦得訟終訟且遠行頽其家聲不暇爲開雕事而枚亦無能有所匡定詩久不歸轉得時時雜誦清微駘宕想見其爲人高士也年齒過差雖私淑卒不得一見然就詩迹其生平蓋嘗入長安遊淮海官鴈門登高懷古思鄉感舊未嘗不潛心深思自信其詩之可傳也老且死竟不能付梓而存之於家家貧子孫又不能付梓以授楊君君故豪士甫欲婆娑相料理旋爲禍敗此如孔安國之古文尙書將獻而以巫蠱事阻也雖精神至者天不能敵而遲之又久鴻寶不宜當時

學文之童子亦將如先生老矣悲夫

高文良公味和堂詩序

詩始於臯夔繼以周召而大暢於尹吉甫魯奚斯諸人此數人者皆詩之至工者也然而皆顯者也自君子道消乃有考槃衡門諸作毋乃窮而後工之說其亦衰世之言乎 本朝文思天子相繼代興厥有新城尙書首唱唐音爲 國初冠天下翕然宗之此亦顯者爲詩之效也然論者猶訾其事藻飾少性情則聲聞雖隆亦尙有未鑿於人心者夫人臣之不可不臯夔也猶詩之不可不唐音也學臯夔者衣以其衣冠以其冠屨擊而拜颺焉其臯夔乎學唐音者習其趨慢聲其句讀終日筦絃鏗鏘其唐音乎善學臯夔者莫如周召然其詩無喜起明良一字也善學周召者莫如吉甫奚斯然其詩無卷阿東山一字也後世王朗學華子魚學之愈肖而離之愈遠此其故可深長思矣明七子學唐用宮調而專摩初盛故多疵焉新城學唐兼角羽而旁及中晚故少疵焉然皆莊子所謂循迹者也非能生迹者也居我朝顯位而以詩聖者其惟大司農高文良公乎所爲味和堂集思沉采鮮聲與律應謂之唐不可不謂之唐又不可其真能潤色休明軼新城而上者矣然而公詩之工未有所聞於人間者則因公之高爵盛業有以掩之也夫士君子每苦無名位以昌其詩而若公之巍巍者又轉以彼累此此予之所以嘆也然就大以見小卽本以該末而公詩之所以工者彌可知矣公從子慧將重鐫公集余從臾成之非徒闡祖德表幽光也將以彰我 朝賡歌之隆不在唐虞下而兼使世之論詩者有所矜式以無事區區摹揣則公之功固亟亟宜表而慧此舉又豈宜得已耶

所知集序

梁昭明不錄何遜之文爲其生存也唐裴潏反之則又非交好者不錄是二者皆有所偏焉夫錄之者傳之也其文之可傳與否非夫人之存亡係之也孟子曰有見而知之有聞而知之道統如是詩文奚獨不然陳子直方選近人詩三集顏曰所知蓋及其身之所見者半所聞者半也夫詩無涯而知有涯四海大矣人才衆矣執邱里之耳目而繩天下而自以爲足焉不已慎乎陳子之名是集也若曰就吾所得者而存焉是亦舉爾所知之義云爾然則未爲陳子所知而漏是集者可無憾矣天下知詩者有涯而不知詩者無涯宋以後詩話日繁門戶日多張一論者多樹一敵若再搯擊而談體例不又慎乎陳子之名是集也若曰就吾所愛者而存焉是亦知之爲知之之義云爾然則陳子於其所不知本置之闕如之例而世之未入是集者又可無憾矣茲集之傳也其庶乎雖然直方之齒未也他日遊益廣學益深其所知者甯就是而竟耶漢杜季雅之言曰知而復知是謂重知吾願直方之重之也

陶氏宗譜序 代振聲作

將收族而忘其祖可乎曰不可本之不存枝將焉附將尊祖而遍收其族可乎曰不可流之太紛源將反混然則尊祖何始曰以始遷某郡者爲始收族何始曰以始遷某郡祖之子孫爲始此陶氏族譜所由立也陶氏系出潯陽淵明後譜牒難考明初蠶哥公死王事以校尉贈都督世襲正千戶其孫靖侯改官蘇州遂家焉吳之有陶氏也自靖侯公始也傳十二世爲振聲祖文英公將做范氏立義莊權輿未就先君子承厥考心而侈大之捐田千金二千建祠因果巷祀靖侯公凡其所自出者歲食其田之租吳中陶氏之有義莊也自先君子始

也振聲謹按大傳曰別子爲祖繼別爲宗康成註云別子諸侯之次子其始遷他國者是然則靖侯公始遷於吳爲陶氏居吳者之始祖禮也第周道親親而中庸則曰親親之殺以爲不殺其疎遠者則親親之道必泛濫無統而所應親者反不得與然則欲收族莫如立義莊欲立義莊莫如修宗譜修之若何曰考始祖以前出者書之譜見本幹所自來考始祖以後出者書之譜見推恩所自起自蠶哥公至振聲凡十四世此本幹所自來也自靖侯公至振聲凡十二世此推恩所自起也明乎此二義而拜祠者既無疎遠隔絕之嫌資財者亦無屑越覲覲之弊此宗法也亦先人志也

張曰恆遺稿序

海內抱一束文屢及於吾廬而修士相見禮者十有十百有百吾未嘗無見焉見後或矚或疎或久或不久雖彼此互有契合處而要之以文爲贄以見爲歡眞州諸生張曰恆寄五律若干來清而婉蓋爲王孟者也余壹不知夫今之爲詩者動學蘇端明致率爾操觚嘉生之獨異於族凡方寄聲促其來而執訊者曰生死矣生年甚少眞州至白門甚近此屨及吾廬之可且暮期者也乃卒不得一抗手豈蒼蒼者以爲詩重而人輕見其詩可以不必見其人歟抑或其人之賢更倍於詩故靳惜取去而不許余之再見之也吾聞造物之奇有所甚祕月之華也麒麟之生也無人見之則存見之而不識猶存有人焉見之識之叫呼而播揚之則散且逝生之不至或懼余之見之識之叫呼而播揚之耶然而詩者心之聲也生詩來矣身雖不至而其心固已至矣而余拳拳願見生之心則卒不能穿九原而一達於生是生可以無憾於余而余不能無憾於生也嗚呼

送許侯入都詩序

許侯從上元令遷水部其邑人爭歌詩寵侯之行余故同城僚也先侯歸一年乃觴侯而弁以言曰情之見於去時者道之存於平日也道何在行乎己者是情何在存乎人者是今夫更南面而臨懜乎毀譽傲乎友朋臨去見有父老指旌旗者見有故人嘆道左者雖酷吏怪物莫不有動於中而深遺愛之羨然則使人人能持其去官時之心爲在官時之心不亦善乎中庸曰不獲乎上民不可得而治又曰不信乎友不獲乎上同城官之獲上也如兩婦事姑殊難得調一切謁朔望集轅轅供頓遞儲俯戒其僕弗相聞知其信友如是其治民可知侯來聞前說而鄙之坦然同懷期於大和事其事兩邑如一邑民以爲便余之歸也侯如失左右手至是侯亦去造物者若以爲二人同其道宜同其去損一人以孤君子其不可也先是尹太保總制江南政持大體民吏雞犬多靜且安羣僚久於其位學射賦詩侯與余如家人往來飲酒樂必嘆曰同官之盛其難再哉忽忽四五年乾隆戊辰冬余引疾去後十日太保奉命入陝再五日陳別駕遷揚州其明年正月王檢校老病死二月太守蔡改知廬州三月吏部徵侯入長安邦人之觀於道者喟曰新官某新官某石頭城中目不一瞬業已若是然則嗣後之改更又將何極此侯之所以臨去而悲也余之所以送侯之去而愈悲也

陶西圃詩序

西圃歿後四年其第三子時行乞序其詩余讀之不覺涕之泣然也余齊年進士三百寡所親狎惟西圃與余同入翰林同作令同乞歸同居江南又同好吟詩以故冬之日夏之夜常宿余家唱喁無算余生平乘人鬪捷之作輒不存而西圃呢余過當雖一短句一調語必書

之集中余不特不省記亦不知也今甫開卷而三十年來之酒痕燈光酣顏高歌歷歷然如影尙存令人於邑不已然後嘆友朋之不可無而西圃之爲我勤者乃如是其至也當西圃入都時予餽以一姬事出偶然非爲西圃身後計也今時行年十七卽此姬所生然則余雖不能爲西圃昌其詩而他日時行之能讀父書恢宏其聲光未嘗非余之助又一奇也西圃貌不踰下中躡躡廉謹乃其詩獨倜儻若不稱其爲人者然孔子曰情欲信詞欲巧梁簡文云人品貴謹嚴文章須放蕩不愧斯言者其西圃乎獨是西圃有三子其長者已生孫已入學而此時之苦抱父書者轉在熒熒未成立之一弱息其畢生精力傳不傳亦可危矣而予兩鬢斑然并此無有乃猶復乙乙抽思謳吟不輟若竟不知人生之有死者抑又何也

虞東先生文集序

文章始於六經而范史以說經者入儒林不入文苑似強爲區分然後世史家俱仍之而不變則亦有所不得已也大抵文人恃其逸氣不喜說經而其說經者又曰吾以明道云爾文則吾何屑焉自是而文與道離矣不知六經以道傳實以文傳易稱修詞詩稱詞輯論語稱爲命至於討論修飾而猶未已是豈聖人之溺於詞章哉蓋以爲無形者道也形於言謂之文旣已謂之文矣必使天下人矜尙悅繹而道始大明若言之不工使人聽而思臥則文不足以明道而適足以蔽道故文人而不說經可也說經而不能爲文不可也雖然藝之精者不兩能鄭馬無文章崔蔡無經解似亦非天所能強吾友虞東先生獨不然先生爲海內經師著詩解若干三禮筭記若干余初疑先生之未必屑爲文也乃記序論議駢禮歌行靡不典麗可誦方知先生不以說經自畫者然猶不敏自是凡予心所謂危者抉擷一二必削而

投之亦非先生之謬爲慊慊也蓋實見夫修詞之道非止於至善不可麗澤之義非朋友講習不可觀先生之深於文也愈嘆先生之深於經也予與先生雖齊年孝廉以宦轍故中道乖分年來設教鍾山得時時過從予有所疑必就先生請業而先生亦來其全稿而謀焉白髮二叟如初下帷作諸生時致足樂也惜予於經學少信多疑而才又短拙治詞章兀兀窮年尙無涯涘勢不能執一經從先生而後而坐見先生之取兩者而兼之也相逼已甚何太不廉耶豈文苑儒林從范氏而分者又將從先生而合耶昌黎答殷侍御云竊欲挂名經端自託不腐予於序先生亦云

贈黃生序

唐以詞賦取士而昌黎下筆大慚夫詞賦猶慚其不如詞賦者可知也然昌黎卒以成進士其視夫薄是科而不爲者異矣今之人有薄是科而不爲者黃生也或且目笑之曰四書文取士士頗多賢其流未可卒非吾代黃生對曰昔管仲遇盜得二人焉盜可以得人而上不必懸盜以爲的也論者語塞吾不敢謂薦辟策試之足以盡天下士也亦不敢謂爲古文者之足以明聖道也然訪某某者必詢其隣人爲其居之稍近也漢唐之取士也與古近其士之所爲古文也與聖道近斯得之矣宋以後制藝道興古文道衰士旣非此不進往往靡歲月耗神明以精其能而售乎時出身後重欲云云則噓唏服臆忽忽老矣予喜生年甚少意甚銳不狗於今其於古可仰而冀也又虞其家之貧有以累其能也爲羞其晨昏而以書庫託焉成生志也旣又告之曰天下有不爲而賢於其爲之者有爲之而不如其不爲者無他成與不成而已不爲而不成其可爲者自在也爲之而不成人將疑其本不可爲而爲者

絕矣今天下不爲古文子爲之安知其不爲者之不含笑以待也苟爲不熟不如蕘稗生自揣不能一雪此言且不宜爲古文吾望於生者厚故反吾言以勗之

史學例議序

古有史而無經尙書春秋今之經昔之史也詩易者先王所存之言禮樂者先王所存之法其策皆史官掌之漢以來作者二十一家互有得失非合參分校則瑕瑜不明南耕先生爲例議十六質确其過其旨遠其辨正此其志與夫爲史通以矜文士之藻者異也其言綱目非朱子所作尤信夫綱目繼春秋者也春秋繼尙書者也尙書無褒貶直書其事而義自見春秋本魯史之名未有孔子先有春秋孔子述而不作故夏五郭公悉仍其舊甯肯如舞文吏以一二字爲抑揚而眞以素王自居耶朱子惡王通作元經擬春秋必不自蹈其非弟子假託亦猶仲舒何休各附會其師說而已夫史者衡也鑑也狹曲蒙匡也國家人物政事則受衡受鑑而盛載於蒙匡者也爲之例爲之議然後衡平鑑明而匡篋亦無舛午之虞然先生老矣未必登石渠執竹簡隨太史之後大書特書有如巧匠袖手旁觀不斷而徒流覽於千門萬戶爲羣梓人程巧而致功焉惜哉

蘭陔堂詩序

讀詩者得古人所言不如得古人所不言淵明不肯折腰見督郵乃賦歸來是說也余嘗疑之夫督郵之必至與縣令之腰之必折淵明豈不知之胡所見之晚而初筮仕之輕也蓋當日淵明有他意存焉不可明言而藉此爲言蘭州太守鄭先生以弟喪去官此東漢獨行者之風也非今令甲也先生必希古以違俗殆亦有難言者存耶然淵明雖不言而於詩則微

言之先生雖不言而於詩亦微言之讀先生詩者知其爲有淵明之心也先生爲漁仲後裔載萬卷書歸夾漈過余索序余以不文辭又以不能急就辭而先生強之甚堅艤舟以待余感先生義甚高交甚廣胡拳拳於野人之一言哉或先生性耽泉石親見枚之乞養者已二十有一年以歸來之人序歸來之人之詩冀其有同心而無愧詞也嗚呼此先生所以有石城三日之泊也夫

從弟獲齋詩序

道無難精之者至焉道無易習之者忽焉羿之射秋之奔蘭子之舞劍淮南之飛昇夔典樂臯陶典刑彼皆知其難而精之者也人知其精不知其難於是射者弈者劍舞者吐納求長生者官太常司寇者盈天下而傳者無聞詩亦然聖如仲尼歌彼婦而已清如伯夷歎命衰而已無多作也今庸走下士紛紛爲詩詩若是易乎不數年漸滅淹消百無一存詩若是難乎從弟獲齋學仙兼學詩有作則漏盡益奮喞呶聲與雞鳴相上下嘗謂予曰人稱詩有仙氣則工然仙人頗不工詩今所傳呂祖白玉蟾詩甚鄙所以然者仙人好逸而惡勞不肯鏤肝鏤腎故耳以此觀之詩不苦思雖仙人亦不能工噫嘻獲齋之於詩可爲知之者矣獲齋患胸中氣學道後小差既苦吟柴瘠益甚稿定便研研然邀相質賞色喜顏和今夫五行之味苦先乎甘聖人之學憤先乎樂然則天下之未苦而甘未憤而樂者其爲甘且樂可知也獲齋早鰥隨失怙恃諸弟相繼歿五秋試不第儼其身走甌閩過阿蘭觀海犯風魚之災歷贛江而南西抵彭城覓一授餐所不得得亦不久天之所以苦獲齋者豈獨詩哉然獲齋不爲詩有苦而已無樂也詩可以由苦而樂又安知境遇之樂乎其後者不與詩同也學仙乎

學詩乎精之以俟其至焉可也爲仙人一雪其不能詩之恥言可也

小倉山房文集卷十終

沈研圃太守送行詩序

士大夫之賢在官見不如其去官見何也在官見賢違道干譽者優爲之去官見賢則味得於回而其真乃彰然官有不得不去者有可以去可以無去者不得不去者或遷或黜或以篤老辭人雖思其賢而明知其勢不能留則望絕若可以去可以無去者其過甚微其迹甚公其不當律令處亦甚小人未免思其賢而望其留及至竟去竟不能留而望之之心猶眷然其未絕絕與不絕送者心也與去者無與也雖然使其去官之故誠過也過雖微其賢自在原不必因其賢而爲之諱若其所以去官之故非過也即賢也則不特其在官之時賢不可沒去官之後賢不可忘而即其所以去官之故亦當爲之白其賢於天下今夫誣告者加等越訴者答此令甲也憲以示民者古人象魏之義然越訴之憲宜於督於撫於監司於太守而何以憲於縣之庭蓋一邑中有里老有尉有主簿有丞而後有令訴者宜先之里老之尉之主簿之丞而後之令此古人立法意也令體且然其上焉者可知左氏曰侵官犯也冒官罪也今之人侵之冒之而自以爲功則何不并羣職而廢之故曰爲政難知政體尤難太守沈研圃先生爲民訴不理鐫級去夫民訴理之宜也縣牒未至而侵冒之非政體也然若爲過則亦無辭先生治江甯六年民熙熙然不知有先生及先生去幼者啼老者泣卹然若有所亡嘻上之設官所以爲民也然往往去留之故多矯拂於民心而爲之民者必號於上而爭之曰若宜留若宜去民之權無能爲也倘上之人又必強其民而脅之曰若雖留而汝

勿許詛也若雖去而汝勿詳思也則上之權亦無能爲也審夫上下交相勝之故而先生不能已於行矣民不能已於送矣邦之人歌詩代餞而屬枚先焉其詞曰

我有亡友號程啟生先生敬之爲其窮經我有弟子厥名陶湘先生延之與論文章兩生窮士顯者所棄先生不然曰我之事惟古太守興氓育才今無其權敢無其懷抱此區區施於有政難告上官可告孔孟漢守吳公治行第一祇薦賈生他事沒沒又有文翁循吏居首考其本傳一事無有但聞入學釋菜奠酒古人往矣存此高風先生來矣心與古同一朝命駕民送於野或鏗其車或繫其馬有江盈尊有淚盈把謂余不信請聽歌者

女弟盈書閣遺稿序

庚寅夏五女弟秋卿以婉難亡于汪氏兩家以爲大戚凡泔姆餘須扈養輩亦俱走位哭三曲而儗蓋其居恆制行字而敬德而度有以孚人之深也逾年妹壻楷亭屬序其詩余不禁累歎洵涕而爲墨其前行曰嗚呼吾忍序吾妹也夫吾忍不序吾妹也夫妹爲叔父健馨公第四女生長粵西余歸叔喪於杭始見妹妹莊姝憇從禮而靜心雅憐之不知其能詩也居亡何讀中秋七夕等作愛其清絕色然而駭亟餉一釵以勸恣之妹竊喜自負益奮從此以詩名噪於時旣婚汪氏得尊章懽恩前室孤如實出己治家循整腴畜偪維罔或勿蠲暇則咿唔聲與鍼衽間作汪故巨族人繁而囂聞妹賢且才爭來窺觀或寄卷册丐題或呈所作求唱喁削改妹推奩具坐肆意酬答藻思盈湧靡不頓頤伏歎有林下風余過揚州視妹妹事余謹甚一浣濯一膏屢必躬辦治知余嗜淖糜雖漏盡歸霜燈熒熒然蘊火龔孟以俟探刺余少休輒剴剴起屢捧草稿出拭几磨墨跌余而笑余戲曰女弟子又索診詩耶應聲

曰何兄之聰也嗚呼此景曾幾何時而今不可再矣妹詩淵雅志潔而情深續乎其猶模繡也因念遂古來哲人偉士得一卷書傳後死猶不死妹雖一女子雖死有可傳者存夫復何悽獨是余年屆大董妹年纔三十八耳例以曹大家爲孟堅續史故事妹當序余余不當序妹乃忽反其局以相將天道茫昧一至於此嗚呼命矣夫

送上元藍令牧邳州詩序

吏科給事中方毓川來言曰制軍鄂公其有道者歟攝篆未及稔劾池守王擢上元令藍其於舉錯也當余聞之始知藍君之遷於邳也夫出處士之大端也世有寢兕持虎望之威如而居前居後無足輕軒者比比也有人焉能使人卽其出處以下其薦之者之賢否則其人之賢否可知也已乾隆十六年

天子南巡南之吏借供張名培克自私藍君獨不然藁秣甘鬻非不取之農也必償其直酒潛甓械非不役夫工也必酬其傭幣純四鬴非不貸之紳士也必量其家當是時蹶者趨者翕翕熱者耀其能於上者僉拙君之所爲不一年雜徭畢乘輿旋民相與述於道官相與

議於廷今之所謂賢否者非昔之所謂賢否也且夫藍君亦豈違人情弛王事徒煦煦焉好聲矜賢而已哉不過體聖天子恭儉慈惠之意力用公正先天下而無所於私也夫當野

薙燎原時而獨施一障以相蔭民跂跂然趨之者自往而不可休此亦情事之易知者也然使知之者多而能之者又多則藍君不拙於前而賢於今矣下邳土瘠而隣河流亡者頗脫不止鄂公以君薦知君能登下其數藹藹萋萋必有以懷柔之也雖然上山者業已高矣然左右視而巍巍者尙在其前則進而上之無已焉夫人發一言善行一事正則必有善與正

之色應面而至此無他未能忘己故也士君子必能忘其異乎人之己而後能存其同乎人之色記稱禮有擯詔樂有相步溫之至也易稱君子獨立不懼而仍藉用白茅柔之至也述矣藍君行之哉勗之哉邦之人所不能已於君者請爲歌詩書於吾言之後

龔旭開詩序

作詩如鼓琴然心虛則聲和心窒則聲滯未有靳拳膠目乞乞自賢而能學詩者也吾雅遊龔子旭開有年其人儼然而靜禁緩其纓行於途望之者皆知爲詩人余論詩稍苛而於所交好者爲尤苛以故旭開詩爲汰其七八意方疑旭開之以不聽聽之也亡何旭開端書兩卷來凡余所未取者盡棄之或取而有所商權者盡易之嗟乎今學者畧識偏旁解韻語便築堅城而自囿者比比也旭開於詩深造有年獨能從吾言如轉圜然則吾言之是非余亦未敢深信而旭開宅心之虛美哉淵乎未可量也其詩如琴之和也固宜旭開不專名一家而布格選調不落唐以後余按周禮調樂以鐘磬爲主作鐘磬必先依律調之然後施於廂懸諸音皆受鐘磬之均所謂聲應律也至於享宴殿堂無廂懸卽以笛爲鐘磬旭開能以唐詩爲鐘磬爲笛爲均其於鼓吹休明也尙矣因其付梓爲序而先焉使世之人知旭開之心而后讀旭開之詩

送劉廣文入都序

學之士三年而大比學之官六年而秩滿士之舉於大比者百有一二焉官之舉於秩滿者百無一二焉夫官士爲之也爲士而舉易爲官而舉難是何也則獨不見夫學中之士乎翩然蔚然濟濟然雖堙沉而俚者亦各挾策而思上臻其學中之官則齷然頽然矍矍然雖臯

俊而銳者亦久於其中而莫克矜奮所以然者國家用人如倉庾氏之登穀也其美者以供
帝之粢盛其次焉者以餼百官養兵而其紅朽而將腐者則又念其本五穀也不忍棄之則
姑置之於陳陳相因不甚辜權之所學官亦然無權無勢無財而又無所督過故其氣易衰
於是世之人見公卿中岳牧守令中有拜起舒遲者喘而言臚而動者爭主撮之利而徵於
顏者必相詆媿曰是何其類學官歟於學官中見有襜襜盛服者儻儻利走趨者齒牙鏗鏘
能識時務而不泥於古者必震而驚之曰是奚不爲公卿岳牧守令歟嘻學之官所以教天
下之爲公卿岳牧守令也而世之人尊彼而絀此乃至於是則官之流弊使然也雖然於無
人之地而求其有也難於無人之地而欲掩其有也又難陳奇寶於廟堂人皆曰宜則亦過
而忘之矣若置之卑辱奧潔之所雖鄉曲僂夫亦必代爲傷屯悼屈而動色相顧此又物理
之自然而不關乎其遇不遇也農坡劉君官上元學六年予疑其人浮於官將必速飛今年
二月果舉最爲縣令而江南北之任是職者凡百數十人皆莫與焉邦之人爭爲君榮不知
不足以榮君也何也君固公卿牧伯才也匪止一縣令也惟其一紆折於學官間而人乃適
適然驚然則是舉也非君之榮乃學官之榮也且夫物之能雄其曹者非止一隅一所而已
也既能雄乎學官之曹之上必能雄乎邑宰之曹之上君之此行也其無所不雄又可知也
然而黃老家言固有以捨爲取以退爲進者吾願君自今以往聽其身之日上而心不與焉
是則朋友贈言之義而已

東臯詩存序

乾隆庚辰予過東臯邑侯何西舫數稱汪生楚白之才予心識之而以遽治裝故不獲相訪

今六稔矣弟子秦云亭來手一編曰此汪君所選東臯詩存也汪君死遺命呈先生且索序且付梓嘻汪君此選將以存東臯詩耶然汪君存則東臯詩因汪君而存汪君不存則汪君之名又將藉東臯詩存而存其序與梓也誠不宜緩也何休曰古者婦人五十無子擇其辨獲伉健者使居民間采詩故幽隱必達今其法已亡雖有鈞韶異音聽者一過蕩爲飄風無人焉彙而存之詩甯能自存耶汪君慨然倣宛雅故事輯而存之篤矣乎仁者之情亦居東臯者之幸也惜劔剛未已賈志以沒而余又相稽於邂逅不獲一交臂共揜羣雅賺人意然亦豈料汪君於委化時不釐亂不顧妻子悲泣而轉以鄙人之弁語爲拳拳方知韓仲卿稱曹子建夢中求序定非誕語而汪君之於是集果如是之不苟然也宜表而出之使後人知之

裴中丞退思圖序

古名臣未有不抱出世之心而能有高世之功者也昔人稱謝傅功高百辟心在一邱猶云晉人風味若唐太師裴晉公則饒饒王臣以身繫天下安危乃園居綠野物外自娛此其心豈眞耽江湖忘魏闕哉蓋亦守不以寵利居成功之戒而且以爲進思盡忠退思補過者大臣事也倘進之日多退之日少則宜其忠不足而過有餘矣退而靜思非深山邃林其奚居焉裴二知先生開府皖江畫科頭小像雅跼松石間兩僮抱琴一兒子執書侍其旁壘障重巖綿瓦莽蒼觀先生圖知先生不愧晉公之裔也今夫鳳皇儀於虞廷騏驎駕於殷輅夫豈不際隆翌聖爲世禎祥哉然其心未嘗不樂烟霞而思山野也惟其能有是心故不繫不蹶而用乃益神先生以此意託之於畫若有所慕而未遂者然不知身之所居者迹也心之所

存者神也神之所存迹不足以拘之古之人有履朱門若蓬戶者有視伊呂若筦庫者先生於道大行時而能遐思物外不以勛業自矜此其胸中早已滌萬物而籠千古矣然則牙旗羽葆皆可作清泉白石觀也呵噉引隍皆可作松風水竹聽也縱

天子爲蒼生故不肯以此境賜先生而先生心中之清夷又何嘗終日不在畫中耶若夫知足不辱知止不殆之語則未免猶有己之見存而未足爲先生誦也畫之前未題額畫之中未題詩先生不畀他人先以屬枚先生之意以山水付山人猶之居細旆廣廈間當聞鈞韶而之乎蓬蒿廣莫之鄉則必爲野音而后善之也枚不敏其又何辭

汪樸廬聖湖詩序

聖湖淳淳然橫於杭之城西而春而秋而昏而朝丈夫女子儻儻俟俟咸嬉遊焉躑躅焉羣以爲美而卒不能言其所以美也樸廬先生爲詩若干凡嘉卉雜樹荒祠古亭靡不以五字韻之而又自趙宋以來一典實一故事必縷述焉凡聖湖之所有者詩靡不有也即聖湖之業已無者詩則未嘗無也今而后聖湖之美先生言之矣且盡之矣惟是先生與枚同傍聖湖而生同別聖湖而仕當先生在家時未始有詩而今始追而爲之則又未嘗不嘆人情之近則易忽而遠則相思也今年先生七十有六枚亦四十有五園田宅舍同具白門想重到兒時釣弋處相攜而迭謠知復何日蒼蒼在鬢烟波在天三復斯篇如蕩舟湖中水色猶明紙上則先生之索序於余也蓋亦越吟而使越人聽之之意也

幽光集序

人能詩疇不欲傳其詩雖然有天焉未可必也第梓而行之公之於天下而詩人之事畢矣

余交海內詩人四十年其詩之已粹者勿論或未粹而其人存或雖不存而其子若孫猶存則粹之傳之吾何容心焉惟夫苦吟終身而且貧且賤且死且無後則所矜矜自抱者豈不
如輕風飄雲之澌滅哉當其賞一句之奇搜一字之巧何嘗不渺棄萬有指千秋以爲期而
一旦溘然付諸不可知之數易地以思於余心能無惛惛乎使敵帚自享原不足以長留天
地間則亦聽其湮沉焉宜矣而往往不傳之詩有高出於世所傳之詩之上者則天之所以
留後死之人者其意爲何也何休云古者男子六十無子使之民間采詩余今年正符此例
因取平生所錄亡友詩各加一傳粹而行之取昌黎幽光二字爲其集名嗟乎此集中者皆
東西南北之人余業已不獲過其鄉弔其墓矣而藉此一編開卷宛然九原若作足慰衰年
懷舊之思且使天下人得而讀之知我所集者如是我所未集者尙無窮也則或有繼我而
爲採風者

雨亭公子遺稿序

今年春高公子雨亭從京師寄圖來屬其弟潤亭索余題詩圖畫美少年著縑單衣坐松石
上心欽遲之以爲公子貴人也而飄飄然有物外之思何超雋乃爾且長安詩人麻集誰不
趨公子下風者雨亭不此之求而偏走家書千里外乞言於不肖之身何也居亡何聞宮傳
有西河之戚心憂之未敢請問又月餘潤亭手一編而泣曰先兄未見所題圖已委化矣然
先兄雅好吟詩曾執訊來索子詩與歸愚尙書詩今所存若干慮其零落子爲我序而存焉
余讀之麗則清婉想其人深於情者也敦古處者也淡榮利者也嗟乎物必相合也而後相
思銅山鐘鳴麤寶鐵應皆以氣相感召者也雨亭之詩余一見而愛之然則余詩之蒙雨亭

之求之也亦宜昔人云荀君雖少後事當託鍾君予羸老也半生烟墨不獲付託於知音而翩翩公子之詩反灑老淚爲之點定天下事甯堪測量哉然歸愚尙書先雨亭一年而歿則此時之與雨亭地下賡歌無疑也而余猶視息人間未知何日得遂執鞭之願悠悠千載結此心期生不過畫上相逢死不過集中一序天使我二人之交情如斯而已則又不如兩不相知之爲妙也悲夫

胡稚威駢體文序

文之駢卽數之偶也而獨不近取諸身乎頭奇數也而眉目而手足則偶矣而獨不遠取諸物乎草木奇數也而由蘖而瓣鄂則偶矣山峙而雙峰水分而交流禽飛而並翼星綴而連珠此豈人爲之哉古聖人以文明道而不諱修詞駢體者修詞之尤工者也六經濫觴漢魏延其緒六朝暢其流論者先散行後駢體似亦尊乾卑坤之義然散行可蹈空而駢文必徵典駢文廢則悅學者少爲文者多文乃日敝若夫四六者俗名也庚桑楚及呂覽所稱四六非此之解柳子稱駢四儷六樊南稱六甲四數亦偶然語耳沿此名文於義何當宋人起而矯之輕倩流轉別開蹊徑古人固而存之之義絕焉自是格愈降調愈卑靡靡然皮傳而已雖駢其詞仍無資於讀書文之中又惟駢體爲尤敝吾友胡稚威有意振之得若干卷錦摛霞駁技至此乎然吾謂稚威之文雖偶實奇何也本朝無偶之者也迦陵綺園非其偶也今人不足取於古人偶之者玉溪生而止耳再偶則唐四家與徐庾燕許也吾將偶之而恐未逮乃先爲之序

蕭十洲西征錄序

馬端臨志地極博然吐蕃一考不過采唐書舊語而無所發明蓋端臨以宰相子爲儒臣未嘗出塞不能見而知之而兜牟介冑之士又不能磨盾鼻以相助就使其人而爾時南宋屯危求保一偶尙不可得何暇走荒服以外哉此輿地之學所以必詳於大一統之朝也吐蕃至本朝爲西藏來享來王最爲馴伏蕭公十洲鎮安康五年著西征一錄余讀之不徒嘉其鈞考詳密而兼嘆公之將畧獨偉出於等夷從來著書之道與治兵通治兵者號令其發凡也隊伍其體例也行止其章法也魚麗鵝鸛左孟右孟其目錄也大而至於鳥蛇龍虎之變細而至於梁麗渠答鈞梯井竈之微分而省之合而參之必使部居別白而後可以克敵取勝公輯吐蕃之疆域以至物產方言靡不鱗羅包舉是豈徒矜典博以將軍而爭太史之職哉誠恐小有驛騷則按吾圖籍措而安之無難也乃公竟賈志以卒不能爲帥師之長子銘功勒石唱呼而還又不獲爲鞬韉象胥宴舌人而歌槃木得母有未竟其才之憾乎然吾所悵悵而悲者猶不止是也每見世人著書尺許問其子孫不知卷若干者多矣獨先生子松浦能抱父書來徵吾言以信之於天下其孝足稱也而予於空山水雲間偶展卷觀覺邊笳戍鼓隱現紙上幾欲屬囊韃賦從軍一證書中之奇而自搔白髮則又未嘗不傷其身之老而衰也序成投筆爲向西長望者久之

葉書山庶子日下草序

同試鴻詞科同舉京兆同登進士同入詞館者余平生得二人焉其一爲歸愚尙書其一爲書山庶子尙書以詩名而先生以說經聞論者曰說經人多不能詩又曰詩頌聖者難工不知詩即經也賡歌喜起半頌聖也果能說經而何有於詩果能頌聖而何憂其不工先生著

春秋若干卷晚年督學楚黔歸恭逢

天子有謁

陵平西夷兩大典先生拜手賦詩彙而顏曰日下草質不過樸麗不傷雅洵足以光揚緝熙昭章元妙因念先生與尚書俱持節俱衡文俱詠卷阿又俱予告回籍以其道傳東南之學者文人遭際晚年益隆余齒最少官最卑三十年來與先生宦轍乖迕通一訊不可得今忽相依石頭城下春餘夏初花欄水牕時時張飲置具婆娑文墨先生白髮飄蕭而余亦蒼蒼在鬢文人遇合晚年益親然而回首玉堂彼此都如天上自今以往所以重科名而報國恩者其在數行文字間乎昔也同升翱翔王路今也同歸詠歌昇平天實爲之非偶然也故承命爲序而不禁欣然奮筆焉

萬柘坡詩集跋

亡友萬柘坡遺集若干程魚門昵之陳古漁非之二人皆深於詩者也訟而質於余余欲通兩家之意特加點按集中五七古沉摯之思如窮淵泉而縋出之真古豪矣近體索索殊少真氣說者謂爲宋人所累余按宋名家絕無此種考厥濫觴始於吾鄉榦材諷說之徒專屏采色聲音鈎考隱僻以震耀流俗號爲浙派一時賢者亦附下風不知明七子貌襲盛唐而若輩乃皮傳殘宋棄魚菽而瞰豨苓尤無謂也孫伯符謂公路云恨不及其生時與共辨論柘坡與余總角之交九原有知必喜聞過而余亦深悔當年不早進規語致留才人未竟之憾逝者已矣來者未已爲抉其瑕以見其平生之所誤者止於是也而大美乃以益彰且以嚴詩之防而謹其所趨否則文章公器目論者謂竟可以好尙異也其不然矣

南村唱和詩跋

昔予知金陵南村西圃兩同年時來官舍蓋西圃蕪湖人南村蕪湖宰一葦之杭渡江便至而三人者又均以詞臣改官故相得尤權予乞病之年爲跋其同舟唱和詩忽忽三十年都不省記今年南村之子衍杜將板而行之寄此卷來屬予點定予就其詩考其存歿南村亡十五年西圃亡七年作序之寶意先生亦亡十年卷內人無一在者而予當日同官中最少年今亦皤皤六十翁矣杜少陵所謂老病懷舊生意可知除淚落行間外尙何餘語惟念衍杜能存先人之詩并能寄先人數千里外之友而使之共存其詩有子如此可謂賢矣至於詩之清婉讀者知之無需宣揚而一篇之中往往一則曰隨園再則曰推袁想見當日交情相厚如是而亦若預知我之將爲後死之人也噫

野處堂遺稿跋

徵士綿莊程君將葬枚往助屬引之役其季南耕手一編泣然曰此先君子所述作也先君子純終領聞有踐繩之節其犖犖大者具諸名公墓表矣惟詩文之多遺嗣章與亡兄懼遏佚前人光集僅存者將付於梓子甚文而又與亡兄同辟公府爲加墨簡端似於誼所不當辭枚受而讀之其理瀆其言正幽谷之芳翠於百草非有意先之也乃自然也嘗謂世無無本之學古所傳談遷之史韋氏之經皆父學也南耕與其兄以經史分家各有纂著非先生基之者深何以有此然綿莊垂死以此編授南耕南耕年亦七十五矣耳聾目營行圈豚一揖幾墮而猶日守父書欽欽在抱嗚呼哉孝也亦庶幾古之爲人後者歟

小倉山房文集卷十二

錢唐袁枚子才

篁村題壁記

壬申余北遊見良鄉題壁詩風格清美未署篁村二字心欽遲之不知何許人和韻墨其後忽忽十餘稔兩詩俱忘丙戌秋揚州太守勞公來誦壁間句琅琅然曰宗發宰大興時供張良鄉見店家翁方填館篁村原倡與子詩將次就坊宗發愛之苦禁之店翁詭謝曰公命勿坊是也第少頃制府過見之保無曠否宗發竊意制府方公故詩人盍抄呈之探其意制府果喜曰好詩也勿填今宗發離北路又四年兩詩之存亡未可知予感勞公意稽首祝延之不意方公以尊官大府而愛才若是亟錄所誦存集中夸於人道失物復得然卒不知篁村爲何許人今己丑歲矣八月十一日飲江甯梁方伯所客有蕭山陶君者蒼髮淵雅傾衿談甚樂不知即篁村也次日來又次日詩來署名曰元藻終不知即篁村也弟子陳古漁闖然入睇其小印曰曠陶篁村在此耶余聞之如結解如迷釋如天上物墮適適然起舞蓋古漁耳篁村名甚久而不知余之更先之也今夫天下大矣方聞之士衆矣邂逅慕思付諸茫昧甯料有承顏抗手時耶旅壁殘墨剝無萬萬數而此五十六字偏蒙護持又甯料知音之外更有知音耶相思垂二十年卒不遇既遇復將交臂失又甯料有旁人來無心叫呼爲指而明之耶然方公勞公俱已物故而我與篁村幸留其身以相見則又安得不駭且賀而終之以悲也因憶平生過邗江寺壁愛茗生詩過金陵書肆愛東亭詩二人者均不著名氏均訪得之一爲蔣君士銓一爲董君潮未幾均登甲科入翰林與余同史館而茗生自西江移

家來得朝夕見甚狎東亭則終不見且死矣或未必知余之拳拳其相思也友朋文字間亦有遇有不遇而況其他遭際哉

隨園記

金陵自北門橋西行二里得小倉山山自清涼胚胎分兩嶺而下盡橋而止蜿蜒狹長中有清池水田俗號乾河沿河未乾時清涼山爲南唐避暑所盛可想也凡稱金陵之勝者南曰雨花臺西南曰莫愁湖北曰鍾山東曰冶城東北曰孝陵曰雞鳴寺登小倉山諸景隆然上浮凡江湖之大雲烟之變非山之所有者皆山之所有也康熙時織造隋公當山之北巔構堂皇繚垣牖樹之藪千章桂千畦都人游者翕然盛一時號曰隋園因其姓也後三十年余宰江甯園傾且頽弛其室爲酒肆輿臺囁禽鳥厭之不肯軀伏百卉蕪謝春風不能花余惻然而悲問其值曰三百金購以月俸茨牆剪闢易簷改塗隨其高爲置江樓隨其下爲置溪亭隨其夾澗爲之橋隨其湍流爲之舟隨其地之隆中而欹側也爲綴峰岫隨其翳鬱而曠也爲設宦窳或扶而起之或擠而止之皆隨其豐殺繁瘠就勢取景而莫之天關者故仍名曰隨園同其音易其義落成歎曰使吾官於此則月一至焉使吾居於此則日日至焉二者不可得兼舍官而取園者也遂乞病率弟香亭甥湄君移書史居隨園聞之蘇子曰君子不必仕不必不仕然則余之仕與不仕與居茲園之久與不久亦隨之而已夫兩物之能相易者其一物之足以勝之也余竟以一官易此園園之奇可以見矣己巳三月記

隨園後記

余居隨園三年捧檄入陝歲未周仍賦歸來所植花皆萎瓦斜墮梅灰脫於梁勢不能無改

作則率夫役芟石留巖土脈增高明之麗治之有年費千金而功不竟客或曰以子之費易子之居胡華屋之勿獲而俯順荒餘何耶余答之曰夫物雖佳不手致者不愛也味雖美不親嘗者不甘也子不見高陽池館蘭亭梓澤乎蒼然古蹟憑弔生悲覺與吾之精神不相屬者何也其中無我故也公卿富豪未始不召梓人營池園程巧致功千力萬氣落成主人張目受賀而已問某樹某名而不知也何也其中亦未嘗有我故也惟夫文士之一水一石一亭一臺皆得之於好學深思之餘有得則謀不善則改其蒔如養民其刈如除惡其創建似開府其浚渠鑿山如區土字版章默而識之神而明之惜費故無妄作獨斷故有定謀及其成功也不特便於己快於意而吾度材之功苦構思之巧拙皆於是徵焉今園之功雖未成園之費雖不貲然或缺而待周或損而待修固未嘗有迫以期之者也孰若余昔年之腰笏磬折里甍喧呶乎伐惡草剪虬枝惟吾所爲未嘗有制而掣肘者也孰若余昔時之仰息崇轅請命大胥者乎五代時僂檀利宴宣德堂歎曰作者不居居者不作余今年裁三十八入山志定作之居之或未可量也乃歌以矢之曰前年離園人勞園荒今年來園花密人康我不離園離之者官而今改過永矢勿諼癸酉七月記

隨園二記

園林之道與學問通藏焉修焉不增高而繼長者荒於嬉也息焉遊焉不日盛而月新者狃於便也然警者爲之徒鉤鈞析亂而已吾固不然爲之勤遊之勤恒若有所思念計畫以故登登陘陘耳無絕音雖然學之不足精進可也園之不足則必傷於財而累於廉烏乎可繼乃恍然曰人之無所棄者業之無所成也西不盡流沙南不盡衡山此非疆宇之有所棄乎

夔典樂則棄禮孔子執御則棄射此非學術之有所棄乎天且不全故世爲屋不成三五而陳之孟子亦曰人不爲也而後可以有爲吾於園則然棄其南一椽不施讓雲烟居爲吾養空遊所棄其寢彫剝不治俾妻孥居爲吾閉目遊所山起伏不可以牆吾露積不垣如道州城蒙賊哀憐而已地隆陷不可以堂吾平水置藥如史公書旁行斜上而已人壽不如屋吾穿漏液構案廬小於狙猿之杙如管晏法期於歿身而已不筮日不用形家言而築毀如意變隙地爲水爲竹而人不知其不能屋疏牕而高基納遠景而人疑其無所窮以短護長以疎彰密以豫畜材爲富以足其食徐其兆而不趨爲犒工而恤夫使吾力常沛然有餘而吾心且相引而不盡此治園法也亦學問道也丁丑三月記

隨園四記

人之欲惟目無窮耳耶鼻耶口耶其欲皆易窮也目仰而觀俯而窺盡天地之藏其足以窮之耶然而古之聖人受之以觀必受之以良良者止也於止知其所止黃鳥且然而況於人園悅目者也亦藏身者也人壽百年悅吾日不離乎四時者是藏吾身不離乎行坐者是今視吾園輿如環如一房畢復一房生雜以鏡光晶瑩澄澈迷乎往復若是者於行宜其左琴其上書其中多尊疊玉石書橫陳數十重對之時倜然以遠若是者於坐宜高樓障西清流洞湫竹萬筴如綠海惟蘊隆宛喝之勿虞若是者與夏宜琉璃嵌牕目有雪而坐無風若是者與冬宜梅百枝桂十餘叢月來影明風來香聞若是者與春秋宜長廊相續雷電以風不能止吾之足若是者與風雨宜是數宜者得其一差強人意而況其兼者耶余得園時初意亦不及此二十年來庸次比偶艾殺此地棄者如彼成者如此既鎮其費矣夫何加焉年且

就衰以農易仕彈琴其中詠先王之風是亦不可以已乎後雖有作者不過洒澹之事丹堊之飾可必其無所更也宜爲文紀成功而分疏名目以效輞川云丙戌三月記

隨園五記

志餘於才則樂才餘於志則不樂吾志願有限而所詣每過所期自分官職得郡文學已足而竟知大邦家計得十具牛已足而竟擁百畝園得一椽已足而竟四記之疏名目而分詠之私揣余懷過矣哉不意數年來過之中又有過焉余離西湖三十年不能無首邱之思每治園戲做其意爲隄爲井爲裏外湖爲花港爲六橋爲南峯北峯當營構時未嘗不自計曰以人功而倣天造其難成乎縱幾於成其果吾力之能支吾年之能永否今年幸而皆底於成嘻使吾居故鄉必不能終日離其家以遊於湖也而茲乃居家如居湖居他鄉如故鄉驟思之若甚幸焉徐思之又若過貪焉然讀易賁之六五曰賁於邱園束帛戔戔吝終吉輔嗣註云施飾於物其道害也施飾邱園吉莫大焉謂邱園草木所生本質素之處故雖如束帛雖吝而終吉左氏曰樂操土風不忘本也余雖貪不知止而能合於易以操土風或免於君子之譏乎彼世之飾朱門塗白盛者或爲而不居居而不久而余二十年來朝斯夕斯不特亭臺之事生生不窮即所手植樹親見其萌芽拱把以至於蔽牛而參天如子孫然從乳哺而長成而壯而斑白竟一一見之皆人生志願之所不及者也何其幸也雖然草木如是吾亦可知吾既可知則此後有不可知者在矣戊子三月記

隨園六記

嘗讀晉書太保王祥有歸葬隨葬兩議方知隨之時義不止嚮晦入宴息而已也余先君子

卒於江甯欲歸葬古杭慮輿機之艱不果欲隨葬茲土又苦無誓宅所以故將牢宄豫慢葬者十有七年思古人未葬不除服之義瞿然自以爲非人今年春有形家來謀園西爲兆域者余聞往視則小倉山來脈平遠夷曠左右有羸隸岸厝草樹翬髯封以爲塋宰如也因思予有地廿年不知一旦而知母亦先君子之靈有以詔我乎遂請於太夫人以己丑十二月十六日扶柩窆焉塋離園僅百步以故牆安穩得時時除其草灌其宰樹審諦其墓石予故貧士幼時先君子幕遊楚粵余遊學京師父子常相離也今以一園之故而先君子厝於斯祭於斯奠幽宮於斯父子蓋未嘗一日相離是豈強而爲之哉亦隨其地之便心之安而已塋旁隙地曠如余倣司空表聖故事爲己生壙將植梅花樹松與門生故人詩飲其中若是者何子隨父也壙界爲二俾異日夾溝可彥若是者何妻隨夫也壙尾留斬板者又數處若是者何妾隨妻也沿塋而西有高嶺窄衍而長凡僦從扈養婢媼之亡者聚而瘞焉若是者何僕隨主也嗟乎古人以廬墓爲孝生壙爲達瘞狗馬爲仁余以一園之故冒三善而名焉誠古今來園局之一變而隨之時義通乎死生晝夜推恩錫類則亦可謂大矣備矣盡之矣今而後其將無記則尤不可不記也庚寅五月記

陶氏義莊碑記

古立大宗以餘財歸之有不足者資之於宗後世廢宗法遂有一族而異目相視者然漢之樊重魏之楊椿均能散所有濟族人數世之窮第未嘗扁表其莊綽楔而書蓋行其心之所安而不以爲義也范文正公修其法號曰義莊公之心豈以義自居哉以爲仁事也而義名之然後使吾子孫知如是則義悖是則不義方克踵行勿倦與吾意相終始而天下之大人

心之同必有慕義無窮而奮乎千百世後者潯陽陶氏之遷於吳也距文正公六百年矣族落落大滿不能無窶人子徵仕郎世魁聞范氏之風而悅之其子員外篠尊父志以繼先賢割沃畚置莊鳩厥宗支振廩同食月會而旬計之吳之人以爲今之陶昔之范也今夫江河之大綿亙萬里而世不能無斷港絕潢者非其本支故也若夫岷山之旁流崑崙之餘波而淤塞就枯焉人能無憾於江河乎惟其能以九里之潤灌溉百川而江河乃愈增其大然則陶氏之以仁爲富也乃其善於持富也傳曰尊祖故敬宗敬宗故收族易曰何以聚人曰財聚即收之之謂也天下人非財不收而況於本族乎余與篠之子振聲戊午同試京兆別二十二年相見吳下持此顛末屬余爲記余喜故人重逢遽聞高義而又私念袁氏族黨零落難收匪徒力有所讓蓋亦自傷其聞之之晚焉

戊子中秋記遊

佳節也勝境也四方之名流也三者合非偶然也以不偶然之事而偶然得之樂也樂過而慮其忘則必假文字以存之古之人皆然乾隆戊子中秋姑蘇唐眉岑挈其兒主隨園數烹飪之能於烝餼首也尤且曰茲物難獨噉就辦治顧安得客余曰姑置具客來當有不速者已而涇邑翟進士雲九至亡何真州尤貢父至又頃之南郊陳古漁至日猶未昃眉岑曰予四人皆他鄉未攬金陵勝盍小遊乎三人者喜納屨起趨趨以數而不知眉岑之欲飢客以柔其口也從園南穿籬出至小龍窩雙峯夾長溪桃麻鋪芬一漁者來道客登大倉山見西南角爛銀盃湧曰此江也江中帆檣如月中桂影不可辨沿山而東至蝦蟆石高壤穹然金陵全局下浮曰謝公墩也余久居金陵屢見人指墩處皆不若茲之曠且周竊念墩不過土

一坏耳能使公有遺世想必此是耶就使非是而公九原有靈亦必不捨此而之他也從蛾眉嶺登永慶寺亭則日已落蒼烟四生望隨園樓臺如障輕容紗參錯掩暎又如取鏡照影自喜其美方知不從其外觀之竟不知居其中者之若何樂也還園月大明羹定酒良斝首如泥客皆甘而不能絕於口以醉席間各分八題以記屬予嘻余過來五十三中秋矣幼時不能記長大後無可記今以一彘首故得與羣賢披烟雲辨古蹟遂歷歷然若真可記者然則人生百年無歲不逢節無境不逢人而其間可記者幾何也余又以是執筆而悲也

西磧山莊記

江橙里先生得西磧山莊之次年賦詩八章走幣索予爲記余告之曰凡遊其地而不能忘者心記之勝於筆記之也予遊山莊一稔矣愛其形勝之奇天施地設非人所爲故常置諸心目微子之請方將書梗槩當臥遊而況受主人誣諉耶莊在吳門鄧尉之西舊號逸園離城七十里極蟹胥鮓稟之饒入其門古梅鋪棗芳樹翳蔚曲澗巉巖環廬而呈所扁表者有清暉閣有九峯草廬有釣雪榭有鷗外春沙館凡十餘處皆各極其勝而騰嘯臺爲尤奇臺袤夷畝許西磧山從背起接天蒼蒼然面臨太湖三萬六千頃之烟波湧湧臺下余遊時適主人程君外出相傳園已售揚州江氏俄而有持蘊火來置竈者詢之果江氏家僮予素知程故高士能詩聞其棄園而駭及聞橙里得之復峽峽然喜蓋橙里之才且賢猶夫程君而與予交尤狎於程君故也因思古者楊憑之宅白傅居之蕭復之園王縉居之天於幽渺夔絕之境往往鄭重愛惜必畀諸克稱此居之人轉不若朱門華堂之濫施而無所於靳也雖然學問之道無窮園亦然程君治園之力盡矣故棄園橙里之力有餘故得園然則增榮益

觀又安知非天之爲園計而故乃捨舊而新是謀耶經之營之似亦橙里所不宜得已園中
亭榭無可改更惟臺旁少屋天風清寒客難久留得構數椽其間觀魚龍出沒與縹緲莫釐
二峯朝夕拱揖豈非置身天際哉苟此室成予雖衰所不百舍重趼而再至者有如此水

小倉山房文集卷十二

...

...

錢唐袁枚子才

安徽布政使新廨題名記 代許公作

凡事之最始者古今人之所屬目者也。卽其官非始建之官而官所駐劄之地自某人始則後之人必將考其姓名以矩其行事。本朝分安徽江蘇爲上下江省，安徽布政使司駐劄江甯，由來舊矣。乾隆二十五年

皇上命增設江甯布政司一員歸安徽布政司於安慶繁者分之遠者近之，所以廣治化專事權也。而松佶適爲始駐安徽之布政使，司除簿領外一切草創，因太守舊署而爲署庫，先焉次堂皇，次賓館，次燕寢，署之東因司馬舊園而爲園，栽竹木置亭增岑樓焉，登可見龍山。工旣成，將題石陷壁而不禁，悚然曰：凡治事者遙而度之不若近而按之之切也，專而謀之不若聚而成之之善也。今有客遊而理家者，雖聰強廉察十中八九而無如身爲寓公終懸揣焉。一旦歸家則瓶罍蕪盜燦若列眉，然其旁或無尊長之誨示，兄弟子姓之贊助，或雖有之而非其同居共休戚者，則事難就，就亦未必盡善。安徽布政使司之駐江甯，此客居而治家者也。其所接將軍司道府佐州縣是尊長兄弟子姓之不同居不共休戚者也。天子知之故以安徽官還安徽，又使日隣近其中丞觀察使府佐州縣咨諏詢度以治安徽之百姓。此於爲政順之至者也。欲不治也得乎雖然，彈琴者改弦而更張之必其聲之和於前而後不負所以改弦之意。元末置十三行中書省於諸路，添設平章明代改爲布政司，蓋卽所謂使相者是也。以甚尊之職而又哀然爲開府之首，其將何以副之必也。如工居肆如肘運臂

使改歸之效確然可指而後此心卽安否則其在近也又何異其在遠也後來之君子當思此言

醉嘯軒記

醉而嘯醉宜嘯而醉嘯宜環流於二者之間庶幾古達者也功園主人作醉嘯軒華不穉雕鏤樸不虞陀侈窈而幽袤廣悉稱旣成凡夫貌執者傾衿者繪者弈者韻絃索者投煒格五者靡不屬至能醉則醉能嘯則嘯主人亦聽客之所爲辛卯冬予過蘇州主人爲軒索記爲記飲余不能飲何以醉不能歌何以嘯不醉不嘯又何以記軒然夫醉與嘯之義有一二聞於師者按嘯旨十五章曰疋曰叱其法今絕矣惟醉人如雲法似不絕然而心醉六經者少則猶之乎絕也吾願遊是軒者能酣典墳則醒亦醉能和心聲則默亦嘯若夫嘗嘗然醉而已矣噉噉然嘯而已矣殆非主人意耶謂余不信請質之軒

馬骨記

丙戌夏五門人陳熙將遠行予止而觴之酒行門外人聲噉噉者手一物入曰皖人畜馬馬負鹽車死剖之腦有骨若山峯殺然黃一市爭傳觀無能名聞隨園主人能博古故來問訊予諦視亦噉也謝之去居亡何陳生參戶入曰昨閱拾遺記載馬首有骨白者日行千里黃者日行八百里前所見馬骨黃其生時殆八百里馬乎予聞而嘆曰斯古所謂骨法應相者是也今王侯上廐其莖香萐披錦障者甯得有應相馬乎然而皖人竟有之矣有之而不能知屈馬以死死而不能知載骨以訪訪而終不能知棄骨以去嗚呼天下之不遇孰有如茲馬者乎雖然彼野人也馬死則已耳不野墮之而遠詢數百里外予於拾遺記頗檢校而

臨事輒忘陳生非有意檢書而忽於此數日間爲死馬得當以報然後知天之生才若隱若現若不遇若遇若有意若無意於淹沉已極計無所復之中而又必使其身分略一表明嘻其憐馬耶其示人耶

史公張秋治河記

乾隆十六年夏六月二十八日黃河決豫州自陽武建瓴而下出延津逾長垣東明達齊魯壽張東阿等郡川瀆來匯如馬逸不止秋七月二十日水穿張秋之掛劍臺而東由大清河入海當衝者城不沒三版民怔忡無措號泣者相環諸河官色變而言隤或請塞掛劍臺口或請拍麥田下疏其流或請貸百姓金聽自遷兗沂道史公抑堂止之下令曰築南北隄二百丈毋稍遼緩成水不左右衝民稍安公乃上書總河顧公曰掛劍口已爲江河矣黃流稽天隄根茫茫將焉置土石欲挑濬者此刷彼淤畚鍤無所施夫上源不斷徒急下流是屋梁之崩而輔以數杙之支不缺則敗爲今計宜聯豫東兩省爲一局急塞陽武咽喉旣斷流乃從事於東東所漫處宜棄故瀆開新河易西岸爲東岸旁築兩隄如翼束而張之增二壩遏水北行如此則河力漸退功可成有他變某請身當之書上當事者壯公言報曰可公乃駐節河上轉巨石仆大木審形司馬別駕行飭料丞若尉行冬十一月十一日塞陽武口十二月朔黃流絕坡河積水消再四日告成清流如鏡水波不揚萬姓曲踊百貨貫費帑一萬有奇是役也微史公幾殆袁枚自陝歸泊濟甯公以其狀來曰夫河決無期而算須有定余豈矜而自功耀後人哉然通變之用多所參證則詳而益明昔趙充國屯田於邊封上文書曰須爲後法余慕古人之用心需子之筆墨將使後之治河者有所考也枚曰諾遂紀其實

於碑

俞氏義塚碑記

周禮蜡氏掌除骹有死於道路者埋而置褐焉又族師十家為聯五人為伍使相葬埋古制民之產名山大川廣谷無禁地公地也恣民之所使之故送死無憾今任土之法廢矣尺寸皆民私也流離之氓天為鳧歿橋死於中野橫陳而已誰能無穢虐士而損所有以仁其類乎丙子歲江南游飢札瘥天昏羈鬼相望捐瘠者焚如者漂溺者蠅蚋之所姑嘖者屬於道俞子曉園以為大戚施糶千餘地百畝聚遺骸而掩諸幽望之畢然高下不及泉上不泄臭竊而臨如旅人成羣得安宅焉鄉里感之有司誼之朝廷旌之曉園亦仁矣哉曉園又來曰余新安人也貿遷江甯去住無恆弗告茲舉於邑長慮有奪其界者是為善不竟也請牒地若干輸於官立精文善法俾傳永永無極吁曉園非獨仁其智且足用也余考春秋晉鄭之間有隙地曰玉暢頃邱岳戈錫子產與宋人盟曰勿有是及子產卒宋人取錫遂尋干戈又周禮墓大夫率其屬而巡墓厲古人之於地界或盟或巡猶有爭者矧茲荒兆難徵於鬼非曉園意思深長他日者且湮且紊且侵削且鈔萊雜下寃伏陵窘為枯骨崇矣欲世世萬子孫毋變宜詳區界而勒諸石凡核得塚長一百七十六弓二尺寬一百三十四弓其存為捨糶費者中有熟地廬舍按年收子利四十餘緡

江甯府題名碑記 代陶公作

守官如守舍然前此居者不知幾何矣後此居者不知幾何矣其後此居者不可得而知也其前此居者則遮避屏列如表之示目鼓之語耳孔子曰三人行必有我師焉善與不善嘯

非吾師此古人官廨題名之所由昉也江甯攝七縣冠九府州於古爲赤緊畿望之全我朝
聖人御世百四十年勤民恤功尤重二千石之選課最者擢之擢虔者黜之久俸者 召
見之吏治蒸蒸光於古矣予量移來淮賦其氓之華離俗之康艾常瑁瑁在抱慮蹈詩人胡
顏之譏欲景前躅以自範而舊無名籍文獻缺然竊不自揆謹考順治元年以來得四十五
人書其姓氏爲之扁表嗟乎此四十五人者或久或暫或賢或否或騰而遷或墜而顛迹雖
不同而要皆懷印曳紱臨民帥吏先余而居此者也卽其在位之歲時以考其政治之得失
思齊乎自省乎目及之而欽耳聞之而警豈徒作區區之甲乙簿同官錄觀哉昔尹鐸尹晉
陽委土以爲師保魯共王畫先賢於壁以自勉二人有心先我而得後來之君子將有肆於
斯舉亦將有感於斯言

漁隱小圃記

吾宗有賢曰漁洲居士居士有園曰漁隱小圃在楓橋之西袤廣百弓客之往來於吳會者
可以泛杭而至去年予初遊目見有所謂無隱山房者做山谷答長老之旨植桂甚繁足止
軒者僅容二人膝語甚奧燕睇堂者長廡重撿可以張飲會賓甚恢宏列岫樓者遮迤穹隆
靈巖諸峯甚曠其他館曰鳥催閣曰來鐘亭曰小衡山池曰戲荷率皆回峯紆流有屢屢晃
漾之觀漁洲告予曰此外舅盤溪王氏之故居也沈文愨公與一時名流賦詩於此石刻尙
存予聞之憮然蓋盤溪與予交文愨與予同年二人存時予尙不知有此園也夫世之以園
傳子孫者多矣不逾時遭其毀棄當時賓從或辟睨於頽垣敗瓦間漁洲不獨能爲盤溪之
園增榮益觀兼能使盤溪之故人補其從前未到之憾此其才且賢爲何如君子嘉夫園也

尤嘉夫居是園者也惜予識盤溪晚識漁洲更晚不獲與石上諸賢同時賦詩又遠隔白門未能屢至心殊拳拳然而園公地也亦私舍也夫己氏得之孰若吾友得之吾友得之孰若吾宗得之毛詩曰豈無他人不如我同姓烟雲有知必當相昵文其顛末非我而誰宜漁洲作記之請嚴乎如有急色耶

記句容叟

舟過燕子磯泊古寺有叟訓數僧貌矍而古鬚髮墮落高吟所作詩齒缺不能音揖而問之曰叟其有道者歟曰余非有道者累於道者也詢其姓曰趙句容人母孕之即不茹葷九歲齒決肉嚙遂絕之誓不娶年十九母亡慕茅山三洞爲神仙居絕欲得之屹然從三人而行裹糧趨洞所洞冥然黑人倒臥作蛇行以進叟先入墮水幸淺無所傷二人者秉燭繼之蝙蝠啞啞萬數如大片黑雲來撲火火滅其一毒虺長三四尺狂走有聲三人苦畏聯衣帶行山根觸頂礙眉石乳雨下訖不得住又五六里得坦穴聞鐘磬鳴大喜奔之石罅水所爲望如黑海昏霧杳藐波浪大作不可窮也鐙盡滅且飢爲是悛而止從原徑返行且臥迷無所復聞人聲如天外呼者則三人之戚友具麥飯紙錢號於洞口也牽以繩三人同上見青天如得故物人間已三晝夜矣叟歸學茹氣呼喻法於三人中最爲長年卒衰廢與他老人同無所名一錢乃教小僧勺食飲以卒日自悔空然慕道幾死穴中嗣後有搯擊而道神仙者以爲妄言非矣

江甯訓導廳壁記

校官官最卑俸最薄廡靡最庫陋其長如是其貳可知江甯訓導署有廳三楹爲前明祠周

忠節公所來官此者率儻盡脩集賓僚於其間非樂神人之雜居也姑舍是而無以爲居也曹君菽衣苳茲未久邑之人興修學宮改祠周公於明德堂之右於是三楹廓然始爲君所有君庀治之平其斂陷增其棗稅於粲洒掃歷書前人姓氏而屬余爲記鑄兩石陷之壁間余按老子云與物且者其身不容言君子不可與物爲苟且也是以叔孫昭子所到雖一日必葺其牆屋曹君本名家子結髮束修儻然思有所建立使周祠不遷吾知君必佻期養力別創禮堂以與諸生講習而況事與時偕先賢如有意以讓之哉雖然力不足而強爲者殆身不勉而旁求者勞校官所入甚微偷物土仞溝陳之無藝則功必難就又或出位越思求助於人人必掉罄之捉搦之功亦未必就曹君旣不肯薄其官視如傳舍而又未嘗旁呼將伯以僎其廉卒之室苟完而道大適此一役也於以見天下無不可新之地無不可勉之官後之坐是廳者俱當健其決而賢其志也廳之前有榆甚古有竹甚宥有柏有柳甚稚有池甚窪濼將次第葺之各因其質以成其美則教士之法亦於是乎觀

江安糧道題名碑記

代陶公作

題名始於漢光和四年而官廨題名厥惟唐始予守江甯仿唐人故事考前人姓氏而書之旋蒙 天子恩擢江安糧道之職循例以書曷敢以後按國初割授副使一員攝全省糧務順治五年改設糧道轄江安徽甯滁和等十府四州自後或裁或置或兼分巡或專督運或添設庫大使或運快並僉雖時時小更而要之擇米慎察吏廉督漕勤僉丁公四者具則監司之職盡焉唐劉晏爲轉運使見一水不通思荷鍤而先行見一粒不運思負米而先登有味乎其言實獲我心矣雖然邦伯侯牧民事紛如供職大難糧道則漕糧一端而已中才循

